

# HYPOCHONDRIASIS

DISPUTATIONE INAUGURALI

P R Æ S I D E

GEORG. MATH. GATTENHOFF

PHIL. ET MED. DOCT. PRAX. MAT. MED.  
ET BOTANICES P. P. O.

IN ANTIQUISSIMA PALATINORUM ACADEMIA

PROPOSITA

A U C T O R E

FRANCISCO ZUCCARINI

AA. LL. ET PHIL. MAG. SATRAPIÆ MOSBAC.  
PHYSICO ADJUNCTO.

DIE FEBR. A. D. MDCCLXIX.

H E I D E L B E R G Æ

TYPIS JOAN. JAC. HÄNER, TYPOGR. AULICO-ACADEMICI.





*S E R E N I S S I M O*

*AC*

*P O T E N T I S S I M O*

**PRINCIPI, ET DOMINO**

**DOMINO**

**C A R O L O**

**T H E O D O R O**

**COMITI PALATINO RHENI,**

**S. R. I.**

**ARCHI-THESAURARIO**

**ET**

**E L E C T O R I,**

**BAVARIÆ, JULIÆ, CLIVIÆ ET MONTIUM**

**DUCI, PRINCIPI MOERSIÆ, MARCHIONI BERGÆ**

**AD ZOOMAM, COMITI VELDENTIÆ, SPON-**

**HEMII, MARCHIÆ, ET RAVENSPURGI,**

**DYNASTÆ IN RAVENSTEIN,**

**&c. &c. &c.**

**D O M I N O, D O M I N O S U O**

**C L E M E N T I S S I M O.**

THE UNIVERSITY OF CHICAGO

PHYSICS DEPARTMENT

1913-1914

PHYSICS

PHYSICS

PHYSICS

PHYSICS

PHYSICS

PHYSICS

PHYSICS

PHYSICS

PHYSICS



S E R E N I S S I M E

AC

P O T E N T I S S I M E

S. R. I.

PRINCEPS ELECTOR!

D O M I N E D O M I N E

C L E M E N T I S S I M E.

**Q**uod academica salutaris artis studia amplecti,  
prosequi, & absolvere valuerim; quod hu-  
jus exercitio sortis tandem secundæ spes in ipsa pa-  
tria mihi affulgeat; TUÆ, CLEMENTISSIME  
PRINCEPS, benignitati, tutelæ, gratiæ debeo.

Ea jam est, SERENISSIME ELECTOR,  
TUÆ in omnes scientiarum cultores munificentiae &  
gratiæ vis, ut non subditorum modo omnium, sed  
&

*& aliorum quam plurimorum animos TIBI devinxe-  
ris : in hoc clientum TUORUM infinito propè nu-  
mero nulli ego, humillima ac devotissima mente SE-  
RENISSIMUM TUUM NOMEN colendo, gra-  
tissimaque pro beneficiis memoria & in cineribus  
meis venerando cedam.*

*Vivum hujus meæ pietatis, gratitudinis ac  
profundissimæ subjectionis pignus, dissertationem  
hanc inauguralem, ad excelsum ELECTORALIS  
SERENITATIS TUÆ thronum humillime advolu-  
tus TIBI, CLEMENTISSINE PRINCEPS ac  
Patriæ*



*Patriæ PATER offero : munusculum soli TIBI debitum , ac utut leve , CLEMENTISSIMA TUA manu vel ex eo dignum , quod SERENISSIMUM TUUM NOMEN singulari TUA IPSIUS venia sibi inscriptum præ se ferat.*

*Hoc , si ea , qua semper soles , CLEMENTISSIME PRINCEPS , serena fronte suscipias ; inter omnes , queis unquam licuit laborum suorum primitias SERENISSIMO TUO NOMINI sacrare , me semper felicissimum lætabor.*

*Vale*

*Vale SERENISSIME ELECTOR ; QUI ut  
semper valeas , cum patria cumque Musis Palati-  
nis opto & precor*

ELECTORALIS  
SERENITATIS  
TUÆ

*Devotissimus ac Subjectissimus  
cliens.*

**Franciscus Zuccarini.**





## §. I.

**M**orbus, a viscerum sub hypochondriis sitorum adfectione a veteribus jam notatus, varia toties symptomatum syndrome illudens, insulsoque a Gallis vaporum (les vapeurs) titulo illusum, potissimum litteratorum miserum stipendium audit, nunc suo in plebem ipsam dominio, Medicorum consilia ingeniaque fatigat; ut tum a sua nostro ævo frequentia pertractationem academicam mereatur, tum ut a vagis vulgi ac Medicorum quorundam præjudiciis in tyronum gratiam salutisque publicæ commoda depuretur.

## §. II.

Varia nascentis mali, varia adulti facies est. Lentis plerumque gradibus obrepit; aliquando sub diuturna animi occultaque ægritudine, mœrore ac tacito curarum morfu, subita adfectuum, plerumque spasticorum, fallaci vehementia erumpit.

i. Insolita quædam pressio in præcordiis molestia a cibo capto, facilisque nec adpetitui nec cibi modo respondens fatietas, cum levi dyspnæa, lassitudinis infueto sensu, meridiani somni cupidine, accedentibus brevibus cordis palpitationibus, somnique nocturni excussa subito jucundia, initia ducunt, plerumque contempta; flatuum fatigant molestiæ, multifonoque murmure venter flagrat; atque in hos, dum molestiarum suarum causas refundunt, facile sibi satisfaciunt, ac in essentiarum suarum stomachicarum usu, addito a cibis so-

A

ler-





lertiori Coffeæ potu, adquiescunt; vini saltem generosioris usui eadem ex medela vacant, atque nonnisi leni addita crapula vespertina, somni quietem conciliant; alimenta interim duriora toties melius, quam molliora tolerant digeruntque.

2. Pluribus licet a prandio cœnave hæ molestiæ sint; videris nihilominus, quos ventriculi potius vacuati tempore, circa vesperum, ante cœnam maneque, incommoda premunt singularis, quam explicare nequeant, anxietatis, absque ulla quidem spirandi difficultate, palpitantis cordis, capitis nubili, levique sed fere continua vertigine nutantis sibi visi, suoque, ut credunt, muneri imparis, animi inquietioris, cum levi etiam artuum tremore juncto. Quod molestiarum genus cibo capto, continuo adeoque a summo mane modici cibi vini-que usu, totumque vorando diem, solarentur.

3. Fugaces de nocte somni, atque dum sensim obrepunt, subitis interpellati pavoribus, cum sensu sæpe subitanæ, fulminei instar ictus, viscerum abdominalium concussionis juncto, anxietates cum cordis palpitationibus cumulant, metuque nunc apoplexiæ, nunc catarrhi suffocativi, nunc epilepsiæ terrent: sed rediens a sequente tranquillo demum somno animus, manens corporis vigor & adpetitus integritas hæc solatur mala, metuque tantisper exuit.

4. Crebræ phlogoses, atque capitis præcipue, sæpe extremorum artuum incalescentia, cum intercurrentibus etiam horroribus, aliquando majori mali gradu, continuo fere manuum pedumque frigore tremoreque, inter anxietates animi futurorumque malorum præsagia, febris ideam ingerunt, atque sub proprio mali sui continuo studio, perpetua pulsus proprii percontatione, febris hæctica pavores animo volvunt revolvuntque; ac Medicos, tum ut sua, quam e venis manuum nunc valde intumescentibus, nunc subsidentibus colligunt, plethora per VSectiones liberentur, tum febris suæ curationes adsignentur, a summo Archiattrorum ordine ad infimam plebis medicastræ sortem, ex anicularum, carnificum, quin & sæpe sacerdotum, urinas ex voto olentium, classe, per totam sensim provinciam fatigant; sed nullorum demum, ex propria  
nullius





nullius hætenus successus experientia, nisi proprii studii consentanea sequuntur consilia.

5. Febris vero, si qua veris comitatur phænomenis, aut aliis, sæpe epidemicis e causis nata, omnino irregularis, multa difficultate tum e coctionis criseosque perturbatione, tum convalescendi labore stipatur: verum natæ ipsius vi morbi febris, omnino irregularis, observationes in semetipsis referunt cl. Viri (a); quæ variabili plane typo, apyrexia vix perfecta, redierit, l. majori bono, aliarum febrium more, paroxysmum sudore finierit, aut levarit saltem.

6. Alvus aliquibus tardior est, tardissimaque aliquando (b), ut nonnisi ficcissima dimittat; aliis ac plerisque mollior, stercorearia, male mixta, biliosa, rufa, subatra, sæpe pallida, sæpe fædissima, repetito per diem nisu, fere tenesmode, secedunt: interque ea alvi phænomena tumentibus hæmorrhoidum tuberculis anus flagrat, aut iis per intervalla fluentibus, aut perpetuo etiam, ut novi, quotidiano pauci sanguinis fluxu notantur: Sed & de inventis malorum suorum in aurea vena causis, naturæque per eam molimine lætantur, atque inter amicorum Medicorumque etiam adgratulationes, animum feliciore erigunt augurio; aureos morbi sui fontes æquanimius ferunt, obstetricante Medico, eos nunc fodiente, nunc fovente, emolliente, nunc irritante, nunc sugente, nunc quocunque artis suæ, plerumque arcano genere consulente.

7. Palpitationis quidam sensus, uti omnes aliquando vel varias saltem partes, sensu ac irritabilitatis vi gaudentes, ferit, uti refert FRACASSINI (c); atque in se ipso tremoris ac palpitationis subtercutanæ specie sensit GARBOE (d); ita & potissimum partes interiores tenet, & trementis cordis, aut

A 2

Aortæ,

(a) GARBOE *experim. ca. mal. hyp.* §. VI. HOPPE *Hamb. Mag.* Vol. VIII. p. 604. 608. Vol. IX. p. 340.

(b) Alvi ad 3. septimanas obstipatæ in hypochondriaco exemplum habet KÄMPF *de infarct. ventric.* Vol. III. *diff. pract.* Hall. it. SWIETEN T. III. p. 492.

(c) FRACASSINI *Opusc. Pathol.* p. 273.

(d) GARBOE l. c. §. VIII.





Aortæ, aut Cœliacæ palpitantis sensu, polypi latentis aut aneurismatis formidine repleverit ægrum Medicumque, ut novi, alias sat celebrem; aliquando conjuncta perpetua quasi circa ventriculum pressiois molestia, ac continuo plerumque ingestorum vomitu, pancreatis scirrhusi & jamjam carcinomatosi specie prognosique fefellerit (e).

8. Sed aliis has similesque inter molestias, fortior auctusque adpetitus (f) sponte disjicit hos mentis pavores; imo aucta sæpe animi lætitia, atque in risus proclivitas, aucta salacitas, nocturna per somnum *λαγνύματα* vegetioris etiam corporis ideas substituunt; ut præmaturis sibi consulant matrimoniis, vel naturæ vires scortando jactitent; nihilominus sua, quæ cum Medico maxima esse solet, amicitia, suas vel Hæmorrhoidibus, vel flatulentiis, vel aliis queiscunque causis potius, quam turpitudini querelas deferunt.

9. Aliæ imi ventris afflictiones variant; sæpe lumborum, ossis sacri dolores, sæpe tormina & cardialgiæ vexant; alios stranguria affligit; alios modo cum lento stillante humore aliaque affectione genitalium molesta, urinæ emissio, modo ejus etiam absque ullo dolore in vesica suppressio vexat. Sæpe sub anxietatis ac viscerum palpitantium sensu ingruente, urinæ copiosæ aquosæque fluunt! ut & hac ratione varias morborum formas simulent, ægrosque novis terroribus compleant: ita diabetem cum passione hypochondriaca conjunctum describit KRAZENSTEIN (g); calculum renalem sæpe mentiri, observat FRACCASSINI (h).

10. Verum non soli hi viscerum abdominis limites sunt, morbi hujus sævitiem mirabilesque formas concludentes; quin in alias simul partes, totumque corpus sæpenumero porrigitur:

(e) Pulsationem in aorta, art. mammaria, cœliaca tam vehementem, ut aneurisma simularet, adnotat FRACCASSINI l. c. p. 243. 272.

(f) W H Y T T *Abhandl. von der Hypochondr.* pag. 188. *It. not. ad H A L E S I I hæmat.* p. 178.

(g) *De diabete Vol. IV. Dissert. pract. Hall.* p. 56.

(h) *L. c.* p. 241. 249.





tur: Præter anxietates cordisque palpitaciones, pectus dyspnææ quodam genere, quod subito ingruens, peripnevmoniam notam, catarrhi suffocativi speciem, æmulatur, per intervalla affligitur: sed, uti subito animi adfectu, terrore sæpe, nascitur: ita eo mutato, cedit, contrariisque ideis evanescit, ructibus flatibusque fursum deorsum, liberato Aeolo, mirabili per intestina murmure spirantibus. Aliis saliva copiosior (*i*), aliquando dulcis (*k*); alios hæmoptoe crebra; alios angina quædam spasmodicæ, absque conspicuo faucium vitio, torquent, sæpe redeuntes (*l*).

11. Atque in tanto Symptomatum numero, Capitis mala maxima esse solent, ut cephalææ non tam periodicæ vel vagæ, modo caput universum, modo has, modo illas partes sævo tormento occupent, nunc obtusæ tensionis, nunc frigoris, nunc gravantis ponderis, stuporis, sæpe vertiginosi relicto sensu: ictus cujusdam celerrimi & quasi fulminei, caput trahientis sensum, sensibili cum sono, velut fidei in tetrachordo nimis tensæ, subito nunc ruptæ tinnitu, tempore obrepentis somni, expertus est GARBOE; alii plures dantur, eo toties sensu territi.

12. Crebras inter subitaneasque phlogoses, motus in variis faciei musculis oscillatorii perspicui repunt; ut celerrime mox palpebra vibret, modo labia tremant, modo sensus saltem aliquis tracti ad latus labii, vel cuti inhærentis irritantisque pili, quem manu iterato absterferint, divexet.

13. Oculis scintillæ subitæ, modo muscarum volantium, nigrarumque macularum spectra obversantur, ut imminentis iterum apoplexiæ, vel saltem cæcitatatis, variosque alios irritosque metus animo agitent.

14. Cum qua corporis conditione peculiaris nequitur hypochondriacorum psychologia; cumque repente per fibras ce-

A 3

leri

(*i*) SWIETENIUS T. III. p. 507. ROGER *de ptyalismo* Vol. I. *disp. pract. Hall.* p. 453.

(*k*) HALLERUS *Elem.* T. V. p. 115.

(*l*) SWIETENIUS T. II. p. 706.





leri inordinatoque motu, nerveorum flaminum inordinatæ cientur vibrationes, a mente haud regendæ satis; atque inter varias phantasiæ turbas, series cogitationum male cohæret: Celerimis vividisque ideis phantasia luxuriat; ut ingenii etiam vi acriore polleant, qua objectum in omnibus notionum particulis constantius accuratiusque perlustrant; nisi quidem imaginationis vis major iudicium rationemque perturbet (m): hæcque illa vis est, quam animum Entheon Poëtæ vocant; quæ vivacissimis, quas fertilis imaginatio subministrat, ideis fummos artifices reddit, atque ad optima quæque opera excitat (n); languens languorem corpori animoque inducit; donec excitata quacunque ratione, ad pristina opera excellentiora redeat: Novit homines eruditos BOERHAVIUS (o), qui in loco quodam sapientissimi erant, sed inde egressi, insaniebant præ melancholia, reduces iterum sapientes erant. Ita in contraria toties, mutato ordine idearum, animus trahitur, ut in omnia etiam animi pathemata excedat; mox in risus cachinnosque leviusculo momento diffunditur, rumpantur ut ilia Codro; mox ad tristitiam lacrymasque facili e causa redit: Homines scenicos, qui avidam plebem, risum movendo, auro emulgent, gestu faciles salibusque plenos, plerumque hypochondriacos esse, & sibi solis vix sufficere, tum demum ridiculos, quando ad officium redeunt, & confluxu hominum excitantur, adnotat BOERHAVE (p); addit HALLERUS celebre exemplum PEQUELINI de MOLIERE, qui aliis facetissimus, sibi tristis vitæque pertæsus. Mox tacitis animi furoribus nonnisi hostium suorum, quos fingunt, damna necesse spirant, militumque fortissimorum ideas fabricant; mox data occasione, canes in  
aula

(m) Imaginationi indulgentes, attentione & iudicio minus valere  
*Conf. KLOEKHOF de morb. animi p. 56.*

(n) Maracum Poëtam Syracusanum, ex DONATO memorat Boerhave *de morb. nerv. p. 406*, qui optima sua carmina non nisi furens & mente captus componebat, sed sedatus, nihil præstabat excellens.

(o) BOERHAVE l. c.

(p) BOERHAVE *præf. ad instit. §. 327.*





aula jovis legatos apud PHAEDRUM adparente DIVI Ma-  
jestate, æmulantur. Impavidi nunc, molestiarum suarum im-  
patientes, ultima sibi fata vovent expectantque; mox mortis  
imagine metuque pavidi, inter tristitia sensorii communis nubila  
terrentur, torquentur: Amore nunc rapiuntur, nunc odio;  
animusque commissi criminis conscientia ac pœnitundine lacry-  
mis culpam expiat, sed ad idem mox facili occasione rediturus:  
Qua in sensorii communis mobilitate rectiores probitatis ideæ,  
quas constantius fervent, intercurrentibus antiquis, queis adsue-  
vere (q), l. iis certe, quas averfando diuturnas inter animi luctas  
sibi imprimunt, turbantur ideis; quas sub mediis pietatis exer-  
citiis, variis motibus ac gesticulationibus totidem velut diabolos,  
quasi muscas, abigere velle videantur. Tanta sæpe phantasiæ  
luxuries est, ut alieno idearum ordini si avidius inhient, sibi-  
que in iis placendo, eas sensorio communi vividiores reddunt,  
in melancholiam ipsam maniamque proximam sibi viam parent.

15. Hac corporis mentisque conditione sunt, qui victas dant  
manus, lectoque victas; corpus similibus malis debile, causa-  
rum externarum, quas omnes sibi nocivas ominantur, serie,  
ipsiusque æris liberioris usura eximunt; quæsitæ vitæ in omni  
genere mollitiæ summa, turbas suas solantur; demumque sen-  
sim societatis humanæ officiis excussi, rectisque corporis & men-  
tis usibus defueti, irritis pharmacorum dispensatoriis, suas in-  
ter curas medendique studia tabescunt, tenuesque propediem,  
ut credunt, relinquent exuvias, angelica mox chrysalide avo-  
laturi. Advocatum describit GARBOE (r) per octo annos  
lecto affixum, quem sensim absque pharmacis, nisi solius rhei  
tenui ac repetita dosi, ad artuum suorum usus atque communis  
auræ pabulum reducendo, sola diætâ sanaverit. Alii dantur  
per plures annos lectis suis affixi, Medicorum consiliis obluçtan-  
tes. Felicior fors ægro adfulsit, quem MEAD (s) describit:  
qui ingravescente morbo mortem sibi instantem denuntiat, ju-  
betque

(q) Eæ sunt, quas Poëta canit: *Naturam expellas furca, tamen  
usque recurret.*

(r) GARBOE l. c. §. X.

(s) MEAD mon. & præcept. med. p. 149.





betque igitur, ut moris est, campanam funebrem in templo, ædibus suis vicino, pulsari, quasi neniam suam ante supremam vitæ horam audire volens; Campanarum autem pulsator, cum male rem agere videatur, iratus e lecto surgit, manibus suis modum rectius pulsandi monstraturus; quod cum fecerat, totus sudoribus diffluens, ad lectum redit, mox expiraturus. Vitam autem reddidit iste labor, & convaluit.

### §. III.

Verum & ad morbi historiam pertinet, subjecta morbo hypochondriaco obnoxia, ejusque mutationes varias, quas fida crebraque observatio demonstrat, consideremus.

1. Quanquam huc præcipue tenuioris corporis habitus pertineat, nativa nervosi staminis partisque solidæ teneritudine constans; cum qua a parentum simili morbo toties traduce hæreditario diffunditur morbus: dantur nihilominus.

2. Teste TRALLES (t) lacertosi, robusti torosique viri, nihilominus hypochondriaci; dantur sanguine succisque pleni, æque ac macilenti; dantur exercitati mobilique vitæ generi addicti perinde, ac sedentarii otiosique, hac adfecti ægritudine; sed præcipue huc pertinent, si recte attenderis, tum ii,

2. Quos delicatior parentum sinus a teneris mollissimo vitæ genere fovit, atque a quovis causarum externarum liberiorisque ac frigidioris auræ adflatu sollicitè custodiit non tam, quam simul prima animi, in mala propensi, licentiorisque vitæ germina aluit explicuitque. Tum ii,

4. Qui sub rigidiore Præceptorum imperio teneram jam ætatem studiis meditationibusque manciparunt, vitamque non nisi severioribus studiis terunt. Tum ii,

5. Qui primos pubertatis stimulos secuti, vel vaga venere, vel, quo non aliud turpius perniciosiusque, quod Cl. TISSOT describit, scelere, vel præmaturo matrimonio, molliora adhuc systematis nervosi stamina pessumdant. Tum ii.

6. Quos duro egestatis jugo, vel alia quavis e causa perpetuas inter curas animique mœrores tenet necessitas. Tum ii,

7. Qui

(t) TRALLES de Opio. P.III. p. 37.





7. Qui e vitæ norma, quam sine fræno duxere, per omne libidinum genus vagam; nunc continuo vel religionis ductu, vel initi matrimonii honore imperiove, vel adsecuti muneris gratia, virum strenuum severumque agunt, suisque inclusi cubiculis ad fornacis angulos vel suis negotiis, vel devotionis etiam exercitiis vacant.

#### §. IV.

Mutationes morbi addi oportet, quas experientia demonstrat. imò morbus a nativa debilitate nervorumque teneritudine natus, licet nunquam perfecte tollatur (*u*); mitescit saltem adultiori ætate, atque mutato vitæ genere, propriorumque errorum emendatione fere cessat (*x*).

II. Aliis in Podagram demum fatiscit morbus (*y*).

III. Circa annum ætatis quinquagesimum in scorbutum vel arthritidem mutari, observat LIEUTAUD. (*z*).

IV. In phthisin nervosam majori gradu mutari, observationes Franconicæ adnotant (*a*), testaturque MORTONUS; (*b*) quæ demum in veram phthisin pulmonalem abiret; phthisi etiam pulmonali obnoxios hypochondriacos, eaque a pristina anxioque malorum serie liberari, adnotant Cl. viri (*c*).

V. Aliquando per exanthemata, glandularum subcutanearum suppurationes solvi visus est morbus (*d*).

#### VII.

(*u*) WHYTT l. c. p. 249.

(*x*) WHYTT l. c. p. 89. BILGUER *von der Hypoch.* p. 906.

(*y*) BILGUER p. 903. 907. LUDWIG *inst. Cl.* §. 556. LOE-  
SECKE *Th. Spec.* p. 209.

(*z*) LIEUTAUD *Synops. prax. med.* p. 89.

(*a*) *Frænck. Samml.* Vol. VIII. p. 132. 146.

(*b*) MORTONUS *phthisiol.* p. 92.

(*c*) FRACCASSINI l. c. p. 383. WHYTT l. c. p. 248. HILL  
*von der Hyp.* p. 17. 18.

(*d*) WHYTT l. c. p. 114. HILL l. c. p. 23.





VI. Alios dejectiones atrabiliaræ vel vomitus juvere (e).

VII. Notandum huc pertinet, hypochondriacos minus inflammationibus, aut & febribus acutis obnoxios esse, quod observat Cl. WHYTT (f); imo pesti, aut aliis epidemicis morbis rarius obnoxios, sed correptos acrius laborare, BILQUERUS adnotat (g).

### §. V.

Alia aliorum celeberrimorum virorum experimenta observationesque huc pertinent. Sanguinem ipsum hypochondriaci analyfi Chemicæ subjecit Cel. COLBATCH, referente HALLERO (h); qua constitit portionem urinosam sanguinis fuisse maximam, oleosi principii minorem rationem (i), carbonis minus (k) detectum fuisse. Alii sectiones cadaverum eorum, qui hoc morbo obiisse fuerunt visi, referunt: BONETUS (l) sanguinem atrum in variis partibus collectum; item omenti vitia describit; it. vasa cœliaca, Mesenterica præcipue affecta (m); varices in mesenterio, variasque viscerum lases, hepatis præcipue ac lienis varias corruptelas refert (n): diversas viscerum obstructions mutationesque adnotat WHYTT (o); longam earum seriem LIEUTAUD (p), describit; in qua

(e) LUDWIG. l. c. §. 556. HAEN *rat. med.* P. IV. p. 30.  
KAEMPF *de infarctu vas. ventr.* Vol. III. HALL. *Diff.*  
*pr.* p. 121.

(f) WHYTT l. c. p. 250.

(g) BILGUER l. c. p. 904.

(h) HALLER *Elem.* T. II. p. 104.

(i) HALLER l. c. p. 109.

(k) HALLER l. c. p. III.

(l) BONETUS *Sepulch.* p. 226. T. I.

(m) BONETUS l. c. p. 231. 242. T. I.

(n) BONETUS l. c. p. 294 301. 308. 309.

(o) WHYTT l. c. p. 152.

(p) LIEUTAUD. l. c. p. 91.





qua illa notatu dignior, qua venam portarum vidit adeo dilatam & ampliata, ut genuini intestini molem ac faciem adsequeretur: similem VP. ramum sub coli intestini fine pollicis crassitiem æquasse, vidit KUPFERUS (q); quam eandem venarum Mesentericarum dilatationem BONETUS (r) describit; vasa Mesenterii intestinorumque atro sanguine infarcta, nullam cæterum visceris læsionem, intestinorum gracilitatem, flacciditatemque, colorem varie mutatum describunt observationes Franconicæ (s); imo & sæpe nullas viscerum observari mutationes, adnotat WHYTT (t); uti crebræ infelicissimorum illorum sectiones docent, qui toties a nece, sibimet illata, cultro anatomico legalique examini, ad determinandam ex viscerum conditione melancholiam, subjici, traducta a VVbus stricta lege solent.

## §. VI.

Haftenus experientiæ: queis rationes medicæ demum securius innitantur. Atque si phænomena descripta, quæ proprie strictiusque ad morbum spectant, qui ex immenso symptomatum numero morborum ilias quibusdam audiit, recte perspiciamus; certe nonnisi spasmodica generisque nervosi affectione esse fundata, apparet; si morbi non per viscera sola abdominis, sed per universum corpus dominium, eadem fere utrobique concussionis subitæ phænomena (§. II. n. 3. II.) si palpitationis nunc abdominis (§. II. n. 7.) nunc pectoris & capitis (§. c. n. 12.) nunc cutis universæ (§. c. n. 4.) diffusos sensus; si immensam quandam morbi mutabilitatem, qui a summis terroribus facile ad lætitiâ functionumque naturalem ordinem redit, (§. c. n. 3. 8. 14.); si affectuum animi imperium (§. c. n. 10.) in hoc morbo vel mutando vel

B 2

pro-

(q) KUPFER *de volvulo sanguineo* Vol. III. *Diff. pr. Hall.* p. 374.

(r) BONETUS l. c. p. 227. 242.

(s) *Frænck. Anmerck.* Vol. VIII. p. 147. 155.

(t) WHYTT l. c. p. 168.





producendo (§. III. n. 4. 5. 6. 7.) si causas potissimum in nervos agentes (§. III. n. 4. 5.) si morbi mutationes spontaneas (§. IV. n. I.) atque in phthisin nervosam (§. IV. n. IV.) exitum; si denique nullas detectas viscerum mutationes (§. V.); si alia morbi phænomena, solo nervorum systemate comparentia, sedulo comparaverimus. Rectius certe Nevropathiam appellari mavult MORGAGNE (u); atque morbum solum spasmodicum, a spirituum ataxia pendentem, statuit FRACCASSINI (x) it. FR. HOME (y) aliique; quo inordinatis spirituum motibus, spasmodicis fibrarum contractricium stricturis, plus minusve diuturnis constantibusque, illa phænomenorum effingitur varietas, ut modo ventriculi-intestinatorumque ac præcipue coli (z) vel duodeni (a) spasmis, inclusi, qui semper præsens est (b) aëris, rarefactique immenso volumine, summa diaphragmati, hepatis, vasisque omnibus abdominalibus injuria cum ingenti anxietatis sensu inferatur; inde dyspnæa (§. II. n. 10.) angustiori pectoris area nascitur: inde spastica tensione per œsophagum porrecta, anginae spasmodicæ sensus (§. II. n. c.) inde pylori vel duodeni eodem vitio ingestorum vomitus (§. II. n. 7.); qua immani intestinatorum distensione, nunc constrictione spastica, alternis vicibus per totum canalem citissime sæpe excurrente, flatuum non tam murmura obrepunt, globosque abdominis volvunt revolvuntque, quam

(u) MORGAGNE *de sed. & caus. morb. Ep. XLV. n. 18.*

(x) FRACCASSINI l. c. p. 240. 245.

(y) HOME *princ. med.* p. 223.

(z) Coli tensionem præcipue accusat LUDW. *inst. cl.* §. 553. it. FITCARNE *Elem. medic. Mathemat.* p. 191.

(a) Duodenum accusat ZACH. VOGEL *Krankengeschichte P. I.* p. 74. SCHMIEDEL *de duod. dign.* §. XII.

(b) Facili ingestorum, cumque liquidis nostris mixtorum fermentatione ac putredine nascitur; uti salivam, liquoresque ventriculi & intestinatorum aëre valde elastico scâtere demonstravit HALES. *hæmast. Exp.* 23. §. V. cui experimenta WALÆI, SCHUYLI apud LISTERUM conveniunt.





quam vasorum tum per intestinorum tunicas repentium, tum vicinorum truncorum compressione, angustatione, inter varia vitalis circuitus obstacula, sanguis in vasa liberiora majori momento pellitur: inde capitis artuumque incallescencia subita alternansque, vasorum intumescencia (§. II. n. 4.) faciei rubor sæpe subitaneus, vasorum dilatatio, ut ampliatis orificiis sanguinem fundant, cum crebra sæpe hæmoptoe (§. II. n. 10.) aliove hæmorrhagiæ genere; cordis ipsius auctus labor ac palpitatio, pulsationes in variis partibus enascuntur (c): Inde in venis abdominalibus congestus sanguis, vasorumque sensim majore atonia cumulatus, varia hæmorrhoidum molestia (d), Intestinum Rectum, vicinas perinæi partes, ipsam vesicam urinariam (§. II. n. 6. 11.), imo altiora intestinorum loca multat; quorum vasis dilatatis, sanguis in intestina effusus, moraque corruptus, sensim grumorum fæcisque atrabiliaræ specie effunditur (§. IV. n. VI.); indeque tanta venarum dilatatio observata, sanguinisque atri conditio pendet. Vasorum spasmodis crebræ illæ tum in majoribus vasis pulsationes, aneurisma æmulantes, tum in minoribus, per ambitum corporis dispersis flagrant (§. II. n. 7.); alternosque illos caloris frigorisque sensus pariunt (e); visque motrix, quæ in fibra musculari residet, tantopere irritata, in toto ejusdem systemate diversa motuum producit phænomena, modo concussionis subitæ (§. II. n. 3. 11.) modo musculorum tractionis inæqualis, vel ejusdem saltem sensus (§. II. n. 12.); in ventriculo auctum sæpe appetitum (f) (§. II. n. 8.); alias in aliis partibus turbas,

B 3

ac

(c) Ab obstructionibus repetit MORGAGNE l. c. Ep. XXXIX. n. 19. a convulsionibus l. c. n. 20. it. HALLER *el.* T. II. p. 246.

(d) Hæmorrhoides a solis sæpe flatibus recte deducunt *Frænck. Anmerck.* Vol. VI. p. 312. Vol. VII. p. 506. it. MORGAGNE l. c. Ep. XXXII. n. 10. Duodeni affectionem hic latere toties, *conf. Zach. VOGEL* l. c. p. 74.

(e) WHYTT. l. c. p. 169.

(f) Ventriculi pathemata a turbata fibrarum actione repetit FRACCASSINI l. c. p. 258.





ac præcipue capitis adfectiones (g); secretionis realis (§. II. n. 9.) nunc auctæ, nunc imminutæ phænomena efformat: Atque turbata sanguinis abdominalis circulatione, major vis vasis spermaticis illata, copiosiore seminis secretionem, generisque nervosi irritati mobilissimique (§. II. n. 14.) stimulos addit (§. c. n. 8. §. III. n. 5.) ipso usu, majoreque vasorum injuria, cum crescente indies debilitate increcente; quæ veneris phænomena semper imbecillitatem nervosi generis, morbos hinc spasmodicos, aut prægressos, uti Arthritidem, Nephritidem, epilepsiam, aut comitantes præcipue sequi, observat GAUBIUS (h); eademque ratione in rabie canina, quæ meris phænomenis spasticis consistit, hos canum fere lascivientium mores adnotat LISTERUS (i): eadem hic phænomena, quæ in canibus exsecto liene visa, adplicat BOERHAVE (k).

## §. VII.

Sed quæ demum illa nervorum mutatio, unde tanta fibrarum vis motuumque turbæ pendent? Quæ quanquam ex ignorata hætenus intimiore nervorum Encephalique fabrica, ignotaque plane spirituum materie indoleque, in tam abdito naturæ sinu, atque inscrutabili immensæ subtilitatis arcano haud pateat: attamen observatis constat, hunc uti motuum sensuumque fontem, ita mutatum, earum functionum vitia, a summa immobilitate ac stupore, successiva mutationum scala, ad summos sensibilitatis gradus inferre. Tactum ipsum aliosque sensus, mutatis nervis, ita perverti, exemplis constat, ut imminui pervertique ita visus fuerit, ut se ipsum vix cognoscere potuerit homo (l); nunc perpetuus quasi  
fri.

(g) WHYTT l. c. p. 173.

(h) GAUBIUS *pathol.* §. 821.

(i) LISTERUS *de variol.* p. 6.

(k) BOERHAVE *præl. ad inst.* §. 327.

(l) Exemplum in hysterica refert VANDERMONDE *Recueil périodique* T. VI. P. I. Art. IV. Conf. GAUBIUS *Pathol.* §. 693:





frigidaë auræ sensus incommodus esset; cutisque tam sensilis redderetur, ut subtilissima tela pulcherrimaque Belgarum linthea aspera visa sint; neque holoserici tactus, neque Persici mali tenera pubes ferri potuerit (*m*): in morbis spasmodicis universam fere corporis superficiem ita tenerescere, adnotat GAUBIUS (*n*), ut vel intentatus modo attactus etiam formidinem incutiat: tantam a discedente dolore hysterico carniū teneritudinem, quæ tangi recuset, relinqui, observat SYDENHAM (*o*): Hydrophobia certe ad summum sensibilitatis augmentum redit; ut absque rabie canina in morbis nervosi generis observata sit (*p*) a solo terrore (*q*) it. a colica pictorum (*r*) aliisque morborum causis, in genus nervosum præcipue agentibus, singulari certe nervorum mutatione, quæ non tam aquæ aut cujusvis liquidi, quam aëris lucisque tactum intolerabilem horrendumque reddit (*s*): Eædem in omni genere sensuum mutationes, mutatis nervis, dominantur: Olfactum acutissimum caninumque in hydrophobia BORELLUS refert (*t*); eundem in fœmina a morbo convulsivo natum refert Promptuarium HAMBURG. (*u*) ut amisso visu, eodem discernere homines potuerit: Mirabile plane phænomenon est fœtor perpetuus, a sola nervorum irritatione in hypochondriis,

(*m*) Exempla collegit HALLERUS *Elem. T. V. p. 95.*

(*n*) GAUBIUS *Pathol. §. 694.*

(*o*) SYDENHAM *p. 269. 491.*

(*p*) MEAD *T. II. p. III.*

(*q*) *Conf. Comment. in sc. natur. & med. gestis T. XI. p. 55.*

(*r*) TRONCHIN *de Colic. pict. p. 18. 49.*

(*s*) Aerophobos testatur MEAD *de venen. pag. 104.* SWIETEN *T. III. p. 555.* LISTER *de morb. chr. pag. 41.* MORGAGNE *l. c. Ep. VIII. n. 28. 29.* HAMB. MAG. Vol. XX. *p. 548. Vol. XII. p. 401. 409.* Lucis impatientiam testatur DESPREST *vid. Gœtting. Anzeig. an. 1758. p. 1152.* MEAD *l. c. HAMB. MAG. Vol. XII. l. c.*

(*t*) BORELLUS *Cent. III. obs. 68.*

(\*) HAMB. MAG. Vol. XX. *p. 301.*





driis, quod MORGAGNE (x) describit: Visus obscuracionem antecedere paroxysmum hystericum adnotat HEUERMANN (y): Ea sæpe sensibilitas corpori flagrat, ut levi cathartico vel emetico, vel sola cantharidum adplicatione, vel levi quovis terrore in motus convulsivos incidant (z): fœminam refert BOYLE (a) sono pulsatae campanae vel alio graviore, in summam semper syncopen delapsæ. Quas licet nervorum mutationes ratio humana adsequatur neutiquam, effectibus certe manifestis constant perversæ mutataeque sensibilitatis partium; quæ maximam phœnomenorum hypochondriacorum partem non tam, quam ipsam causam proximam sibi vendicat; unde potissimum supra dicta morbi symptomata oriuntur (b). Inde solidarum CH. partium vitia maxima parte fundantur, quæ ad explicandam morbi originem requirunt cel. Viri: fibræ solidæ debilitatem atque atoniam, relaxatum primarum viarum robur accusant (c), causarumque relaxantium classes, uti calidorum potuum abusum advocant. Quanquam autem relaxationis & atoniæ vitio omnino celerrimus ille partium motus, summaque in eum proclivitas posito stimulo, repugnet, quæ in nimia laxitate abest; atque contradicat torosi robustique & exercitati corporis, nihilominus hypochondriaci observatio §. III. n. 2., morbique sæpe sine reliquis fere corporis noxis, diutissime protracti diurnitas, demum sensim disparsens (§. IV. n. I.); debilitatem tamen, sed ejus peculiare genus in fibra motrice accusaverimus; quod cum generis nervosi vitio connexum, nimiam irritabilitatem, teneritudinem, mutatam perversamque sensibilitatem, ejusque specifica vitia sistit.

(x) MORGAGNE *l. c. Ep. XIV. n. 28.*

(y) HEUERMANN *phys. T. II. p. 990.*

(z) WHYTT *l. c. p. 86.*

(a) Conf. WHYTT *l. c. p. 87.*

(b) Mutatae perversæque sensationi papillarum in ventriculo dispositarum famem & appetitum auctum adscribit WHYTT *l. c. p. 181.*

(c) CARTHEUSER *path. P. II. p. 244.* CHEYNE *act. Edinb. T. VI. p. 134. 136.*





sistit (d); quæ ab ea certe, quæ a ventriculi inflammatione aliisque morbis oritur, distinctissima, toties iis læditur commoveturque, quæ maxime innocua, insipida, omnique stimulo carent; commode acriora, aromata, spiritus calidos, quin & cum solatio perfert, absurda toties adpetit, reliqua nauseat. Atque licet hæc solidæ partis conditio iis nervorum vitiis per universum corpus porrigatur; ut recte quidem morbus universalis, non solum hypochondriorum appellari debeat (e); præ reliquis tamen vel incipientis morbi vel adulti etiam, potior in canale intestinali sedes est; cujus perversa sensibilitate inordinatisque motibus deflagrat (f), licet absque digestionis vitio (g); quæ etiam duriora melius commodiusque, quam molliora digerat (§. II. n. I.). Recte FRACCASSINI (h) morbum solum spasmodicum a spirituum potius ataxia, quam viscerum coctioni inservientium dyscrasia pendere, adserit.

### §. VIII.

Fluidorum vitia an mali hujus vel producendi vel fovendi partem sibi vendicent, dissentiunt Cel. VIRI; uti FRACCASSINI (i) nullum in fluidis vitium concurrere, pluribus differit momentis. Verum, si liquidi nervei in encephalo secretio leges secretionis universales reliquorum in C. H. humorum sequitur; ut positis definitis vasorum secretiorum con-

(d) WHYTT. l. c. p. 83. 84. temperamentum omnino irritabile, constitutio corporis tenera, macra, pallida huc potissimum refertur a BILGUERO l. c. p. 252.

(e) FRACCASSINI l. c. p. 237. 241. 244.

(f) In ventriculo sedem præcipuam ponit FR. HOFFMANN *med. consult.* P. I. p. 216. 292. in ventriculo & intestinis WHYTT l. c. p. 96.

(g) WHYTT l. c. p. 97.

(h) FRACCASSINI l. c. p. 241. 244.

(i) FRACCASSINI l. c. p. 245.





conditionibus, tum pro copia advecti arteriosi sanguinis, tum qualitate variet; atque adeo ejusdem determinata copia ac dotibus naturalibus, spirituum vigor, ejusdem inopia, debilitas, sed & qualitate mutata, liquidi nervei vitiosa indoles sit (k); quatenus ut humor secretus, ex mixtione humorum universali pendet, hujusque depravatæ vitio imbutur. Recte ita BOERHAVE (l) a tenuitate sanguinis majorem ad functiones læsas cerebri cerebellique dispositionem inferri statuit; eademque ratione turbatam sanguinis crasin, & deficientem densitatem inter affectuum nervosorum causas retulit WHYTT (m); uti videmus quotidie teneras puellas virosque, quibus hoc nimix tenuitatis vitium in sanguine obtinet, a levissimo animi adfectu turbari, a minimo fragore totos contremiscere, aliaque debilitatis nervosæ phænomena prodere. Adeo sanguinis aut & reliquorum humorum vitia haud esse excludenda e causarum classe, adparet; quatenus aut ipsius liquidi nervei secretioni serviunt, aut per tenuissima vasa, ubique nervorum non tam involucris, quam ipsi nervorum substantiæ immersa (n), varia nervis irritamenta adfricant: dispositionem inde corporis scorbuticam inter causas occasionales refert WHYTT. (o). Adfinitatemque hos inter morbos ipse saltem ex effectū FRACCASSINI (p) statuit; atque in scorbutum facile terminari demum Hypochondriasin constat (§. IV. n. III.); ipsaque COLBATCHII in sanguine hypochondriacorum experimenta (§. V.) conspirant, quæ & tenuitatem & acrimoniam testantur. Pertinet huc certe acre in sanguine genitum, atque inter causas proëgumenas refertur (q); peculiarem lymphæ mor-

(k) Conf. LUDWIG *de contentione studiorum moderanda* §. IX.

(l) BOERHAVE *de morb. nerv.* p. 154.

(m) WHYTT l. c. p. 138.

(n) BOERHAVE *de morb. nerv.* p. 57. HALLER *elem.* T. IV. p. 189. HEUERMAN *Chyr.* T. I. p. 38.

(o) WHYTT l. c. p. 115. 294.

(p) FRACCASSINI l. c. p. 368. PITCARNE l. c. p. 192.

(q) WHYTT l. c. p. 108.





morboſæ indolem nonnunquam ſubefſe, ſtatuit LIEUTAUD (r); inde morbos cutaneos reſſos (s), it. foniculos, ulcera antiqua ſiccata (t) ad ea mali genera conferre, obſervatio teſtatur; inde & felici naturæ molimine, natis in cute exanthematibus ſolvitur, vel miteſcit morbus (§.IV. n. V.): eadem ratione a febris diu durantibus, ſibiſque relictis, ea in ſolidis fluidisque partibus vitia inducuntur aliquando, quæ ſuccedenti hypochondriaſi faveant (u); dum repetito febris attritu, caloriſque vi, & ſolidæ & fluidæ partes exſolvuntur ſenſim, atque a naturali cohæſionis gradu ac ſpecifica craſi deſiciuntur (x). Inter cauſas remotas adeo eæ referuntur omnes, quæ denſitatem ſpecificam ſanguinis, naturalemque liquidorum tenuiorum craſin pervertunt; unde vaſorum viſcerumque functio, imminuta coctionis opera, partis ſolidæ robur fatiſcit, viſque ipſa nervea, quæ in ſingulis partibus definitis & ſpecificis ſenſationibus præeſt, depravatur, facillimeque alienis oſcillat ſtimulis: quorſum hæmorrhagiæ nimix per partum abortumve, vulnera, V. Sies nimis crebræ, it. vehementiores aliæ per vomitum alvumque evacuationes referuntur; iisque de cauſis à puerperio vel abortu frequens malum obſervavit Fr. HOFFMANN (y), it. SYDENHAM (z). Eadem ratione diætæ vitia varia id agunt, ut defectu probæ nutritiæ gelatinæ, tum ſpirituum materie depauperetur ſanguis, tum proba e craſi defi-

C 2

(r) LIEUTAUD l. c. p. 442.

(s) HILL l. c. p. 23.

(t) WHYTT l. c. p. 115. 137.

(u) WHYTT l. c. p. 84.

(x) HALLER *elem.* T. II. p. 97. 106. 114. 133. Sanguinem a febre ſæpe reſolvi. *Confer.* SENAC *de recondita febris natura* p. 250. Sanguinem reddi ſcorbuticum. HEUERMAN *Bemerck.* P. I. p. 73.

(y) Fr. HOFFMANN, *med. rat. ſyſt.* T. II. p. 112. Teſtatur WHYTT p. 84. HOME *princ. med.* p. 222. Crebraque purgantia ad hunc morbum diſponere notat Fr. HOFFMANN *med. conſult.* P. I. p. 292.

(z) SYDENHAM p. 536.





deficiat, tum fibræ solidæ nerveæque vires cadant: Diuturnam hinc a carnibus abstinentiam incusat SYDENHAM (a); diætā mere vegetabilem CHEYNE (b); abstinentiam inediāque WHYT (c), aliique: qua ipso vitali attritu dissolvitur compages sanguinis, acre salinum oleosumque evehitur: victu vegetabili liquida animalia, ipsamque crustam inflammatoriam sanguinis dissolvi, suis evicit experimentis Theoph. LOBB (d); ut perpetuum inde effectum in mole corporis imminuta (e), debilitate (f), imo paralytica adfectione inducta, viderit. Fructuum horæorum eadem ratio ac noxa est, in dissoluto ab abusu sanguine (g), ipsoque naturali, quod a mucō fibras involvente est, munimine nimis absterfo (h), aucta sensibilitate (i); queis affectibus, accedente aeris, qui copiosus inest (k), per fermentationem evoluti, immani distensione, hypochondriacis plurimum nocent (l); atque in plebe maxime, horum uti & musti pomacei abusu inhiante, ad hunc morbum producendum conferunt. Sacchari eadem noxæ sunt, cujus vis insignis saponacea (m) eosdem in effectus (n) conspirat; atque  
uti

(a) SYDENHAM p. 504.

(b) CHEYNE *act. Edinb.* T. VI. p. 28.

(c) WHYT p. 312. HOME l. c.

(d) Th. LOBB. *de calc.* p. 34. HALLER *elem.* T. VI. p. 200.

(e) Th. LOBB p. 131.

(f) Th. LOBB p. 234.

(g) Ex immodico fructuum horæorum usu serum sanguinis viridissimum vidit HUXHAM P. III. p. 69. musti ex fructibus horæis vim solventissimam testatur *Abhandl. der Naturforschenden Gesellsch. in Zürich.* P. I. p. 282.

(h) Hinc diarrhææ a succo fructuum maxime saponaceo HUXHAM l. c. pag. 64.

(i) Colica hinc sæva. TRONCHIN *de colic. picton.* p. 36. HUXHAM p. 60. 61.

(k) HALLER *elem.* T. VI. p. 222.

(l) BILGUER l. c. p. 186.

(m) GERHARD *m. m.* p. 215. 237.

(n) In sanguine soluto exp. SCHWENKII est *hamatol.* p. 189.





uti a molliore vita vix abest, quin delicatioris gulæ a teneris jamjam annis delicias perpetuo comitatur, ita merito has inter causas pertinet (o): uti dulciariorum omnium, saccharatorum, mellitorum effectus nervis infestos, infantibus, fœminis, hypochondriacis, hystericis maxime obesse, GAUBIUS testatur (p). Acidæ ipsius acrimoniæ, a cibo vegetabili natæ, si liberior dominatur, is effectus constat, ut bilem aliosque influentes in digestionis operam succos enervet (pp); sed & ultra primas vias, uti in debilibus fit (ppp) eluctata, ipsum fibræ terreæ elementum dissolvat sensim, cum dictæ hactenus debilitatis, in solidis etiam invalescentis, effectum (pppp). Varia alia diætæ vitia sunt, quæ, vel ventriculi vires enervando, vel ejus specificam pervertendo sensationem, vel ipsorum liquidorum naturalem crasin turbando, agunt: Potuum certe nimiorum, spirituosorum hæc vis est, qua tum a crebra distensione languet fibra muscularis, tum papillarum nervearum sensus crebro alienoque turbatur stimulo, tum chylo, nimis diluto, hoc potuum gurgite, quin vires chylopoieticas expertus satis subactusque fuerit, in sanguinis orbitam præcipitato, crudo sanguis humore inundatur: quod vitium, licet Veterum Germanorum robore subactum facile, aliena nunc Recentiorum mollitie, quæ tantopere a Veteribus descivit, retento bibendi more, absque noxis demum hypochondriacis non perfertur; debilitatem saltem insignem tremulis manibus prodit, donec adsueto hesterni poculi stimulo animetur: accedit nimia ingestorum moles, victus lauti opiparique genera (q), ac frequens ille maxime aromatum ac gelatinarum ex utrisque Indiis & omnium animalium edulium genere concentratarum

## C 3

usus;

(o) ZIMMERMANN *von der Erfahrung* P. II. p. 282. it. BICKER *vid. Götting. Anz.* an. 1768. p. 143.

(p) GAUBIUS *pathol.* §. 470.

(pp) GAUBIUS *pathol.* §. 325. HUXHAM P. III. p. 66.

(ppp) HUXHAM l. c. p. 14.

(pppp) MACKBRIDE *Versuch* p. 163.

(q) FRACCASSINI l. c. p. 306.





usus; quo non tam intestinorum vasorumque omnium systema gravatur debilitaturque, quam naturalis sanguinis crasis pervertitur, atque intimius acrimoniæ eo genere imbutur, æque composito, ac cibi solent arte coquinaria componi: Accedit vita sedentaria, plerumque accusata, quæ exclusis circulationis venosæ subsidiis, quæ ab actione muscutorum pendent (*r*), sanguinem in minoribus vasis congerit; naturales, quæ a motu sunt, dotes pervertit; atque inertiori demum systematis VP. sinu adcumulat, vires chylopoieseos, porrecto ubique infarctu, adcumulata cruditate, enervat: qua eadem ratione ipsos etiam opifices, mulieres, hypochondriasis obnoxios reddi, BILGUERUS testatur (*s*). Potuum calidorum abusus huc spectat, quo infantum non tam teneritudinem caloris perpetuo quasi incubantis opera fovere, quam omnes fere in adultis aut ventriculi, aut aliarum partium morbosas adfectiones, atque frigoris potissimum in ventriculo sensum solari, atque calefacere in meliorem digestionem contendunt: sed certe, uti frigus illud a laxitate est; ita eo medelæ genere eo increscit magis; quo certius constat, aquam calidam omni phænomeno inter emollientissima remedia pertinere; quo effectu per totum demum corpus porrecto, fluor albus, cachecticus pallor, leucophlegmatica mollities, coctionis turbatæ vires, ventriculi intestinorumque languor, flatuum obmurmurantium perpetuæ molestiæ, phlogoses hypochondriacæ nascuntur: Coffeæ abusus forte majores noxas habet, dum acrimoniam ab oleo empyrevmatico, demum eliquato per ignem resinoso principio, genito, subtilissimam penetrantissimamque jungit, quæ vasis minimis ipsisque nervis stimulos adplicat, vix eluendos; quos manuum tremor, singularis diffusa per corpus irritabilitas, phlogoses crebræ, sanguinis, ut vocant, ebullitio, aliaque & animi anxii phænomena fat docent.

## §. IX.

(*r*) HALLER *elem.* T. II. p. 326.

(*s*) BILGUER *l. c.* p. 131. 132.





## §. IX.

Quanquam has causas inter remotiores pertinere, haud difficulter adpareat; unde solidarum partium major sensim mollities, teneritudo, debilitasque ingeneratur; potissimæ nihilominus sunt, quæ genus nervosum proximiorē feriunt injuria; absque qua varii quidem morbi, viscerumque abdominalium læsiones, vix veri illi, qui ad hypochondriasisin pertinent, spasmodici adfectus gignuntur. Huc inprimis acre illud refero, adeo nervis familiare, arthriticum podagricumque; quod depositum, sedem in nervis figit amatque (t), ita vitali adhuc liquidorum orbita circumvolutum, nervos miris toties phænomenis laceffit, eorumque officia turbat, adfectus nervosos ventriculi, coctionis turbas parit (u): Inde hypochondriasis, erumpente podagra, mitescit (§. IV. n. II.); quam metastaticam PLATNERUS (x) considerat. Aliæ ac potissimæ ipsius mentis adfectiones sunt, quæ in nervos primario, nervorumque origines agunt: Quatenus quotidianis lucubrationibus atque intensiore mentis adplicatione in artium ac scientiarum studio, vel quocunque alio munere vitam exigunt, continuo animi labore terendam: sed medullares fibras, encephalique compagem his mentis actionibus mutari patique, determinationem sanguinis huc augeri, incallescens a studio capitis phænomenon, tensionis sensus, gravitas percepta, defatigatio aliæque molestiæ, vim nervis illatam docent; quæcunque sit pro varia, quam fingis, hypothese, seu nimiam fibrarum cerebri dilatationem, a majori liquidorum impulsu factam, quam major debilitas mollitiesque excipit, impressionibus minus resistens (y); seu tensionem in fibris medullari-  
bus

(t) CASTELLI *exp.* §. 64. 65. 66. TRALLES *de op.* p. 320. 322. HALLER *apolog. contr.* HAEN p. 20. HEUERMANN *chir.* T. I. p. 49.

(u) WHYTT p. 121.

(x) PLATNER *art. med.* §. 463.

(y) HALLER *not. ad præl.* BOERH. §. 415. lit. p.





bus (z), aut arrectionem, partibus nervosis communem, aut tremorem, oscillationem, aut quæcunque motus genera (a) concipias: adparet saltem, vim eam pro intensione adplicatione ac diuturniore, summis demum gradibus intendi; inde fibræ nerveæ debilitas, facillima oscillandi vis celeritasque, mobilitas ingens, flexilitas nimia inducta, mutata in variis partibus sentiendi ratio, & quæ his jungitur, idearum, menti obversantium, conditio, summa vivacitas, sed & aberratio facilis, atque aliena combinatio consequitur: Debilitatem nervosam variosque inde pendentes morbos, vires digestionis prostratas (b); præmaturum senilem marasum inde repetit LUDWIG (c); qui effectus eo promptiores nocentioresque sunt; quo vehementior cogitationum in eandem rem intentio est, non interrupta; qua pars una sensorii communis violentiam patitur haud minorem, quam muscoli singulares fortiter diuque contracti; stamina ejus tam pertinaciter arrigi, credit GAUBIUS (d), ut remitti dein nequeant, aut oscillandi finem non faciant, acrius commota, aut nimium distracta, tenorem denique amittant.

Iidem huc pertinent, qui a teneris severioris disciplinæ ac religionis præceptis imbuti, absque rectiore boni malique judicio, omnia tuta timent, perpetuis animum scrupulis flagellant, hominum consortia fugiunt, atque nonnisi propriæ imaginationis ideis, ac suarum vigore imaginum pascuntur, quem nec doctioris demum Theologi consilia deleant. Similis aliorum animi adfectuum hæc potestas est, præcipue quæ tristitiam, mœrorem diuturnum, metum ac diuturnas edaces curas spectant; quorum adfectuum primarii in genere nervoso effe-

(z) FRACCASSINI p. 297. 301.

(a) Sensus internos motu fibrarum exerceri, probabile est. ZIMMERMANN l. c. P. II. p. 502.

(b) ZIMMERMANN l. c. p. 505.

(c) LUDWIG de studiorum contentione §. II. VIII.

(d) GAUBIUS pathol. §. 529.





effectus luculenta debilitatis nervosæ phænomena produnt; queis tum fracto motu cordis, ut necesse sit, suspiriis transitum per pulmones expedire, tum vasorum nervorumque languore adpetitus hebescit, perspiratio imminuitur (e), menses supprimuntur, vel nasci impediuntur (f), pallor inducitur, aliaque languentis circulationis, dejectæque vis nervosæ phænomena increbescunt; queis tum contagium facilius suscipitur (g); tum febres malignas nervosas (h), maxime inde belorum tempestate (i), atque in obsessis urbibus (k), frequentes generant; terrorque ac metus variolas peiores, lethales (l), ipsasque operationes chirurgicas infelices reddere (m), febrem incurabilem lethalemque accersisse visus est (n). Imo tanta mœroris vis observata est, ut subita quadam cordis paralyfi, mortem subitam induxerit, cujus exempla collecta referunt cel. viri (o): quales certe nervorum circulationisque injuriæ dum loca feriunt, præcipua nervorum vi gaudentia; primos in turbando ventriculo sensus (p), atque languescente sanguinis circuitu, præcipuas in vasorum abd. systemate moras hypochondriacas inferunt. Terroris iidem, sed magis subiti effectus sunt; queis novi virum summo a subita amici morte percepta, terrore perculsum, ac præcipuis inde supra dictis sympto-

(e) SANCTORIUS *sect. VII. aph. 15.* SWIETEN T. II. p. 38.

(f) Hist. morb. Vratisl. p. 313.

(g) DEGNER *de Dysent.* p. 80. ZIMMERMANN l. c. p. 851.

(h) HUXHAM *de aëre & morb.* p. 166.

(i) ROEDERER *de morb. mucoso* p. 22. 30.

(k) BAGLIVIVS *prax.* p. 150.

(l) HUXHAM P. II. p. 132.

(m) *Recueil periodique* T. II. P. II. Art. I.

(n) *Medicinische Anecdoten* P. I. p. 25.

(o) KAAW *de impetum faciente Hipp.* p. 431. GAUBIUS *serm. acad. II.* p. 26. ZIMMERMANN P. II. p. 474.

(p) HALLER *Elem.* T. VI. p. 158.





symptomatibus (§. II. n. 2. 4. 6.) diu conflictatum. Amoris hic locus fere princeps est, seu desiderii rei concupitæ longius protracti; sanguinem incitari, accelerari pulsus (q), sæpe cum inæqualitate, quem admixto metui tribuas, refert HALLERUS (r); Vehementior amor summum calorem, palpitationem, ruborem, robur, pene cum tremore, & sensum quasi ignis, per vasa ipsorum artuum fluentis facit: bene CLAUDIANUS (s):

*Hic habitat nullo constricta licentia nodo,  
Et flecti faciles iræ, vinoque madentes  
Excubiæ, lachrymæ rudes, & gratus amantum  
Pallor, & in primis titubans audacia furtis  
Fecundique metus, & non secura voluptas.*

Sed quantæ hic simul nervorum totiusque vitalis atque animalis œconomix injuriæ comitantur! Mora vel adempta potiundi spes elegantulos toties adolescentes virginesque lurido pallore induit, tabe (t), oculorum vigore fracto ac senili prope intra orbitas sepultura, atra bile, chlorosi, erotomania conficit, crucemque medicis tacitos hos inter malorum fontes figit: Catalepsin inde inductam refert ZIMMERMANN (tt); sed & minoribus malorum gradibus variæ generis nervosi turbæ sunt; ut Veteres de ipso Jove dixerint, eum simul amare & sapere non posse: Recte servus ille apud HORATIUM (u):

*O Here! quæ ver  
Nec modum habet neque consilium, ratione modoque  
Tractari non vult: Amoris hæc sunt mala.*

Ne

(q) Venam frontis ruptam adnotant *Medicinische Anekdoten* P. I. pag. 199.

(r) HALLER I. c. T. V. p. 582.

(s) CLAUDIANUS *de nuptiis HONORII*.

(t) Sine hoste victus marcet, & veneri vacat reparatque amores.  
Senec. *Trag. Agamemnon* p. 429.

(tt) ZIMMERMANN I. c. p. 489.

(u) HORATIUS *serm. L. II. S. III.*





Ne odium parerent memoriæ recentis exempla, plura ex antiquis Veterum monumentis recensuit GAUBIUS (x); sed recentia refert ZIMMERMANN (y). Licentioris vitæ effectus aut matrimonii vel præmaturus, vel seriore ætate, vel queiscunque imbecillioris constitutionis hominibus initi, præcipuæ hæ noxæ sunt; queis toties infecta mascula imitantur, quæ pleraque post Venerem intereunt (z). Nobilissimi humoris, qui cum secretionem spirituum multa communia habet (a), iactura nimia uti in toto corpore vim nervosam dejicit, nervorumque morbos amplissimo catalogo producit; ita debilitatis auctæque irritabilitatis in ventriculo & intestinis symptomata procreat; ut inde morbi hypochondriaci potissimam nostra ætate causam cel. Viri repetant (b), nostrique sæculi longævitati obesse, imminuere civium numerum videatur (c); ac regionum depopulationem plus minus sensibilem exinde demonstret BILGUER (cc); quod nimirum in pessimam illam mentis corporisque virium profusionem & propensio, & contracta inde effæminatio a progenie in progeniem descendat, de quo jam suo tempore HORATIUS lib. 3. Ode 6.

*Damnosa quid non imminuit dies?*

*Aetas parentum pejor avis, tulit*

*Nos nequiores, mox daturos*

*Progeniem vitiosiore.*

D 2

§. X.

(x) GAUBIUS *serm. acad. II.* p. 33.

(y) ZIMMERMANN l. c. p. 490.

(z) HALLER *Elem. T. V.* p. 576.

(a) TISSOT *de febr. bilios.* p. 188. 208. GORTER *de perspirat.* p. 215. 219.

(b) FRACCASSINI pag. 306. ZIMMERMANN l. c. p. 392. WHYTT l. c. p. 84. BILGUER p. 56. BICKER *Goett. Anz.* an. 1768. p. 142.

(c) BALLEXERDE *phys. Kinder-Erziehung* p. 24.

(cc) BILGUER l. c. p. 80. 81. 82.





## §. X.

Verum quid demum viscerum, in abdomine sitorum, glandularumque obstructions, vasorum atrabilarii infarctus ad hunc morbum producendum alendumque conferant, quaestio nobis discutienda. Atque latentibus hisce vitiis licet antiquioris, & nostri ævi complures pleramque morbi vim originemque adscripserint; ut in curando morbo etiamnum in has tollendas obstructions totis medendi viribus connitantur; neque negari possit, ipsis cadaverum sectionibus toties palam ejusmodi demonstrari vitia (§. V.); ut sub spasmis hypochondriacis gravior sæpe viscerum labes subesse visa fuerit, improvise aliquando lethalis, adnotante MORGAGNIO (d); quorsum omnino Veterum de atra bile observationes doctrinaeque conferunt, quæ late in turbandis encephali mentisque functionibus, in commovendo nervorum systemate dominaretur; communique observatione constat, posita in primis viis causa putrida, toties emoveri mentem non tam, quam sub ingenti vitæ languore, spasticos illos tremulosque motus, in malignis putridisque febribus per universos diffundi nervos.

Sed si rem paulo accuratius consideremus, alia omnino morbi phaenomena sunt, alius exitus, facies plane alia morbi est; qui hoc viscerum infarctu vel atrabilario vel scirrhuso fundatur: Sub varia functionum læsione chronica, lentis plerumque variorum morborum adfectionibus, nunc colicis doloribus, flatulentis etiam, adpetitus prostratione chronica, molesto pressioni sensu in hypochondriis, & circa ventriculi regionem, nunc in icterum, nunc cachexiæ alia genera facessit; nunc leucophlegmatico corpus humore inundat; vel in varia demum hydropis genera definit; nunc lentas inter miseras tabe conficit, nunc febrilibus etiam motibus illudit; queis, ut sæpius novi, gangrænam abdominalem evolvunt; qua iisdem fere, ac in malignis solent, phaenomenis moriuntur: sed plerumque spasmodum hypochondriacorum descripta  
facies

(d) MORGAGNE l. c. Ep. XLV. n. 27.





facies abest; lienumque induratorum exempla sunt, absque ulla hujus morbi suspitione (e): nisi quidem eadem hypochondriasis scaturigine, circulationis abdominalis vel a spasmis, vel debilitate turbetur tenor; indeque adgesto in vasis liquido, viscerum infarctus, sanguinis a stasi mutationes atrabiliaræ, adeoque effectum morbi inducantur (f); unde infarctorum viscerum, aut atræ bilis cum vera hypochondriasi confunduntur ac complicantur symptomata: Atræ bilis certe plerumque accusatæ, quam e Veterum tenebris revocavit BOERHAVE, nulla alia ratio est, quam sanguinis diuturna stasi corrupti colliquatque, quam aliquando cadavera ostendunt (§. V.) vel ejus inter turbatas motuum leges, e vasis in ventriculi intestinorumque cavo patentibus, sensim extorti, atque inter eorum numerosas plicas detenti, varieque corrupti (g); quo per vomitum quidem, aut alvi dejectiones nigras, quas atrabiliaras vocant, eliminato, morbi levamen fit (§. IV. n. VI.), haud vera curatio; dum manens ab obstaculis ac debilitate sentina facile pristina sanguinis corruptela ac colluvie exundat: Inde est, quod toties nullas viscerum mutationes, nisi solam aliquando debilitatem flacciditatemque cadavera exhibeant (§. V.); id quod SYLVII observationibus (h) confirmatur, qui se ultra centum hypochondriacos partim, partim melancholicos, liene salvo & incolumi præditos, dissecurasse adfirmat; docent ii præcipue, qui summis mentis turbatæ erroribus, melancholiæ propriis, violentas vitæ propriæ manus inferunt, cadaveraque relinquunt, quæ omni labe vacua, atræque nescia bilis, solos nervorum spirituumque errores recondunt, quos frustra acie anatomica quæsieris: Inde est, quod solis animi vitiis morbus producat ac foveatur, atque voluptatis flagellum, sæpe & calcar existat; quod quo plus instiget, eo magis

D 3

noceat

(e) LITTRE habet in *act. A. R. Sc.* an. 1700. Obs. 7.

(f) Varias viscerum mutationes ad effectus morbi hypoch. reducit. WHYTT p. 168.

(g) Eandem rationem refert WHYTT p. 183.

(h) Adducit QUELMALZ de liene §. 26.





noceat (§. II. n. 8.): Inde est, quod sola ætate toties, quæ teneriores nervos indurat, aut mutato vitæ genere, quo facilimæ in nervis oscillationis stimulus hebescit, absque relictis in corpore noxis, vel cesset omnino, vel sopiatur (§. IV. n. I.), donec nova prurientis ideæ occasione, in priora vitia (§. IX.) animus redierit: Inde est, quod phthisin sæpe nervosam (§. IV. n. IV.) continuato malo, relinquat; quæ potissimum solidarum partium summa fracedine, liquidorum exhaustorum aut penuria, aut pessima crasi, a spirituum proborum indole alienissima, consistit. Eadem hæmorrhoidum ratio videtur, in qua toties præcipuam atque immediatam morbi hypochondriaci causam referunt (§. II. n. 6.): Quæ certe, uti vasorum abd. debilitate, aut circulationis venosæ obstaculis generantur; quæ plethoram abdominalem, cum vario vasorum, quoquoeversum porrectorum, onere ac symptomate, accumulatur: ita facillimo quidem hujus nevropathiæ effectum fiunt; dum cum debilitate nervosa necessario illa circulationis impedimenta conjunguntur (i): Verum dum similibus adeo, quæ debilitatem inferunt, causis nascuntur (k) hæmorrhoides; aut eodem saltem fonte, nisi juncta majore nervorum injuria, nevropathia scaturiet; aut inter causas hujus remotiores pertinent; uti plures dantur hæmorrhoidibus, absque hypochondriasi, obnoxii; dum inter hujus quidem symptomata frequentissimæ esse solent hæmorrhoides. Verum & simul adparet, ab earum fluxu etiam aut parum fiduciæ solatiique, licet expectarint plurimum, aut nihil plane consequi: Novi aliquos, qui quo ferociore barbarum nervosarum paroxysmo impetuntur, hæmorrhoidum copiosiore ac quotidiano fluxu, media inter solatia medicorumque expectationes, laborant; qui hæmorrhoides nunquam copiosiores, quam instantibus hisce turbis, sentiunt perinde

(i) Nullum juvenem quidem hæmorrhoidarium vidit *Ludwig*, nisi languidum, & variis affectibus spasticis obnoxium, de hæmorrhagiis ut causa debilitatis p. 10.

(k) Nunquam bona solida, sed morbosas affectiones ab hæmorrhoidibus vidit *TRALLÈS hist. Cholerae* p. 27.



perinde, ac alios urinæ aqueæ copiosæque stimulus admonet: Enimvero qui arteriosis finibus dilatatis funditur sanguis, quod quidem tum a venosi systematis immeabilitate ac resistentia, tum retro urgente arteriarum nixu, frequentissimum esse solet, sanguinisque fusi florida indole ac tenuitate cognoscitur; comodi nil certe, nisi ab imminuta aliquantum in continuo vasorum systemate pressione, sæpe plurimum damni adfert, continuatis sanguinis arteriosi dispendiis, maxime corporis robori nervorumque vigori inimicis (1): e venis, quæ atrabiliarum piceamque saburram educunt, rarius funditur; licet aliquando inter perversas motuum leges, contrariaque circulationis itinera, vigente spasmodum vi possit, levamen utique maximum malo adferet, sed manentibus causis, in infarctu vel vasorum atonia positis, propediem redituro: licet & toties hæc sanguinis atrabilaria conditio, quam concipiunt, plane absit, atque cum sequente nervorum malacia, cum disparante hæmorrhoidæ, circulatio naturali ordini viisque nunc liberatis, absque relictis aliis noxis, restituatur.

## §. XI.

Verum & suis Therapia difficultatibus laborat; dum eo tollendarum, quas vulgo concipiunt, obstructionum studio, omni remediorum aperientium, solventium conatu, omni genere conquisito intensoque, succurrere adlaborat. Eoque scopo salium diverso genere, sapone tum artificiali, tum naturali, gummi ferulaceis, succis herbarum recentium expressis, interpositis crebris catharticiis, aquis mineralibus, animosæ epotis, imo & balneis, toties pugnat; eoque medelæ genere, dum vel pejus inde habent, vel nihil saltem emendantur ægri, mutatis formulis, omnia harum classium remedia successivo ac diutissimo usu convocat. Verum lustrato satis hypochondriasis mirabili ingenio, elucet potius, omnium solventium, fundentium colliquantiumque inanem, imo nocivam operam esse: salium certe,

(1) Conf. de HÆN de hæmorrh. p. 35. LAMBSMA de fl. ventr. p. 124. Frænck. Anmerck. Vol. VII. p. 499.





certe, quæ præcipue acido vitriolico componuntur, uti ꝑ Glat. arc. dup. &c. difficiliorumque solubilia sunt (*m*), continuatus usus stimulos plus minus rigidos infert; queis perpetua irritatione & aquosa colluvie fibra debilitatur magis (*n*); atque in sanguinis etiam massam eluctatis, varii in eodem solvendo effectus prodeunt, qui a salibus quidem lixivis promptiores (*o*), neque a mediorum l. neutrorum genere absunt (*p*); ut suspecta merito ob vasorum stimulum, & acre, humoribus inductum habeat cl. MALOUIN (*q*), cautelasque inde ab humorum dissolutione repetat POHLIUS (*r*). Siqua vero, uti facile fit, a turbata coctionis opera, atque facili ingestorum fermentatione plenior, copiosos ubique flatu eructante, aut ipsa vasorum, in intestinis exhalantium, debilitate (*s*), cruditas pituitosa copiosior subsit, quæ glandulosos partium vicinarum glomeres facile infarcit; teneriorum salium facileque solubilium usus sat probus esse potest, dum roborantibus jungitur, uti ꝑ solub. laudatur a WHYTIO (*t*) it. BALDINGER (*u*); quique a solubilitate fere reliquis præfertur (*x*); licet & eas aliquando noxas adnotet cl. WHYTT, queis flatu augeat, ac deliquia accersat: Eadem certe tum saponis veneti aut alicantini, tum saponum nativorum sunt cautelæ; quorum virtute maxime gummata ferulacea, succique plantarum nativi scatent; sed uti in fundendis dissolvendisque coagulis, ita in naturali etim

(*m*) SPIELMANN *elem. chem.* p. 49. 124.

(*n*) LUDWIG *infl. cl.* §. 817. PLATTNER *art. med.* p. 105.

(*o*) SCHWENCKE *hæmat.* p. 190.

(*p*) GERHARD *MM.* p. 166.

(*q*) MALOUIN *med. chym.* p. 255.

(*r*) POHL *de excretionum moderamine* §. X.

(*s*) WHYTT l. c. p. 146.

(*t*) WHYTT p. 393. form. probam componit. KLEIN *select. med.* p. 191. ex pulv. flav. cort. aur. rh. ꝑ r. sol. addito elæosacch. cajeput.

(*u*) BALDINGER *Kranckh. der Preussisch. Armée.* p. 131.

(*x*) CARTHEUSER *elem. chem.* p. 200.





etiam sanguinis densitate destruenda vi pollent; atque ea, quam prædicant, abstergendi & nudandi virtute, abrafo naturali mucofo tegmine, fibram attenuant, irritabiliorem sensibilioremque reddunt, & exorbitantes jamjam irritabilitatis auctæ stimulos necessario exasperant; id quod copiosa observatione constat, nullosque non convincit, nisi eos, qui sinceritatem HIPPOCRATIS, SYDENHAMI averfantur, errores suos, ut doceant, palam profitentium. Diætæ vegetabilis fructuumque horæorum noxas ex iisdem rationibus & cel. virorum observatis supra jam adduxi §. VIII. Sed & ex his simul pares fere aquarum mineralium cautelas intelligimus, quas teneriori præcipue Ali principio scatentes, nostris in oris Schwalbacenses commendant, atque ut efficaciores reddant, singulo primo haustui  $\ominus$  sedlic. dosin adjiciunt: sed ea certe, qua solent, aquarum ingurgitatione, ac ingenti velut cataclysmo, tantum abest, ut vel infarctus demoliantur, vel acre eluant, vel robur fibris debilibus addant, ut potius obruant, ac quasi suffocent vires superstites; quæ validæ satis requiruntur, ut cæ excernantur copiæ, quæ intra corpus adsumptæ, solis vitalibus viribus reguntur, ut suis excerni possint colatoriis (y): major omnino tum a copia liquidi distendente, tum ab aqua relaxante, quam paucis dilutissimi & enervatissimi martis viribus, est effectus: quo debiliora certe & irritabiliora hypochondriaci vasa læduntur (z), adjecto præsertim salium usu, alvoque quotidie stimolata, junctis adeoque noxarum utrarumque viribus (a): salubribus mehercle effectibus, quos spondent, contra

(y) Confer. FRACCASSINI p. 338.

(z) Debilioribus cavendas vult BOERHAVE *de morb. nerv.* p. 153. aquas minerales iis nocivas, quibus laxior corporis habitus, & atonia ventriculi & intestinorum, pluribus momentis probat TRILLERUS *de specificorum remediorum fide dubia* §. XI. nocivas iis, qui imbecillitate laborant Fr. HOFFMANN *med. conf.* P. I. p. 91. it. indebilitate ventriculi, viscerumque abd. l. c. p. 193.

(a) Crebra purgantia ad hunc morbum disponere. Conf. F. HOFFMANN. l. c. p. 292.





tra dicit experientia; neque ulla, nisi calidis matutinis potibus nunc substituto frigido, atque animo ad res, magis placentes, converso, corporisque ex lege & compotantium consuetudine, facta majori exercitatione salubritas esse potest; siquidem dictis aquarum noxis superandis par est. Thermarum ac balneorum calidorum rarior quidem usus ac solet esse commendatio; nisi qui viscerum suorum obstacula fibrarumque stricturas externa potius emollitione solari, quam curare velint; dum cum ea interim partium solidarum debilitas increfcit, auctaque externa pressione, accedente a calore rarefactione motuque accelerato, impetus in viscera debiliora, cum vasorum toties læsione rapitur, frequenti hæmoptoes aut hæmorrhagiæ cujuscunque aut apoplexiæ eventu. Balnea frigida, adparet, nisi hypochondriaca respueret mollities, majore nervis vasisque robore reddito, omnino utiliora esse (b). Venæsectionis porro, ad quam fere præ reliquis frequentius inter suos, quos animo agitant metus, confugiunt hypochondriaci, regulas ex his haud difficulter statuimus: Sed eam certe, quod cum mole imminuta, & ipsa specifica densitas sanguinis decrescat, auctaque feri ad globulos rubros proportionem (c), inde laxitas debilitasque cum necessario irritabilitatis & ataxiæ augmento (d) inducatur, nocivam plerumque cum cel. Viris (e) adgnoscamus; ipsique, si recte adtenderint, facile consentient ægri; qui faciliore fere animi deliquio inde obnoxii, ventriculi turbatas functiones, adpetitum prostratum (f), alias debilitatis auctæ, ac ferocientium spasmodorum effe-

(b) Ea commendat, cautelasque addit WHYTT p. 263.

(c) HALLER *elem.* T. II. p. 330.

(d) TISSOT *de febr. bil.* p. 123. 126. 156. it. nov. act. N. C. T. I. pag. 81.

(e) FRACCASSINI l. c. pag. 346. LIEUTAUD l. c. pag. 92. PLATTNER *art. med.* §. 467. BILGUER p. 923. nov. act. N. C. l. c.

(f) TISSOT l. c. p. 123. CARTHEUSER *diæt.* p. 26. UNZER *arzt.* P. X. p. 156.





effectus (g) sentiunt, vel eos, etsi mitigati visi fuerint, paulo post majori violentia redituros. Nos ea in medendi methodo melius certe a diæta, quam in medicamentis consilium petendum, cum cl. LIEUTAUD (h), ipsoque FR. HOFFMANNO (i) aliisque judicamus, nervorumque turbas ac ipsos sensum juventutis errores religiosa animi tranquillitas compescet facilius, quam importunum medendi studium, quod plerumque etiam hos inter metus fluctuans animi inquietudo turbat: Id agimus nimirum, ut animo ad placida objecta, eaque sæpe variata converso (k), evitatis causis omnibus, unde illa in nervis debilitas, atque in quasvis ideas exorbitans facile irritabilitas augeatur foveaturque, corpus vario sensum exercitationis genere roboretur (l), atque a sua victus aërisque mollitie consueta revocetur; corticis interim peruviani usu, cujus tantæ in eo genere laudes sunt (m), nervosum genus, fibras solidas roboremus, sanguinis vitiosam tenuitatem corrigamus; utraque ratione tum coctionis instauretur opera, liquidorumque vitia, aucta vitali vi, sensum dispareant; addimus pro re nata, vel interponimus lenes rhabarbari doses, quod roborando non tam intestinales fibras, quam latentem saburram irritantem evacuando, eosdem in effectus conspirat: Martialium quoque hic summum usum commendant, ipsaque in substantia (n); nisi ventriculus nimis adhuc irritabilis respuerit;

E 2

Tinct.

(g) In morbis spasmodicis per VS. spasmos intendi observat FR. HOFFMANN *med. rat. syst.* T. I. p. 302.

(h) LIEUTAUD l. c. p. 93.

(i) FR. HOFFMANN l. c. p. 415.

(k) Animi recreationem optimam statuit FRACCASSINI atque præfertim per concentus musicos p. 348.

(l) Equitationis summos usus observat SYDENHAM p. 522. solam hanc efficacem vid. in Hamb. Magaz. Vol. XI. p. 345.

(m) SYDENHAM p. 519. LOESECKE *MM.* p. 441. FRACCASSINI p. 328. TORTI *Therap. febr.* p. 429. HEUERMAN *Bemerck.* P. I. p. 145. WHYTT infusum vinosum aut spirituosum laudat & exemplis probat p. 254.

(n) WHYTT p. 259.





Tinct. Gl. St. Prifata Ludov. similesque teneriore Stis Glo  
constantes (o), vario encomio, virorumque cel. consensu cele-  
brantur: adduntur extracta amara (p); quorum tum in ma-  
jore fibrarum robore, tum facillima illa, quæ in ventriculo  
debili est, ingestorum fermentatione prohibita aut moderata,  
experimentis PRINGLIi constat (q): dum spasmodorum interim  
ingruentium ferociam castoreatis, vel assa fœtida, vel moschi  
etiam dosi addita, vel leni cautoque opiato (r) compescimus:  
qua medendi ratione diu continuata, & mala demum & no-  
stræ tractationi imponimus

## F I N E M.

(o) Hist. morb. Vratisl. p. 24. pharmacop. pauper. Edinburg. p. 60.

(p) WHYTT p. 253. 288.

(q) PRINGLE p. 412.

(r) Crebrior usus nocivus Fr. HOFFMANN T. II. p. 277. effectus  
noxios, debilitatem, atoniam refert WHYTT p. 271. licet  
sæpe necessarium & utile sit.







## COROLLARIA.

1. **Q**ui sufficit morbo cognoscendo, sufficit & eidem curando: 2. quousque vero in cognitione Medicus rationis & experientiae inopia decipi potuerit a Natura, eousque, fortunæ suæ studiosius, & ægros & mundum decipiat necesse est. 3. Ipsa plebis decipi amanti amens credulitas & fanatica superstitio frequentissimum fuit Medicastrorum ignorantiae asylum. 4. Quoties in febribus acutis perversæ eorum medelæ pro votis & promissis non obsecundantibus indomabile morbi venenum accusavere? Audaces interim officiosissima cum sedulitate ac consolatoria garrulitate ægro famosisissimis suis antidotis ac aureis alexipharmacis ignem subjicientes, exustis aut in putridum conversis humoribus, demum vel prodeuntibus pessimi ominis exanthematibus de veneno expulso victores triumphabant, vel silentibus subito & simul pravis symptomatibus (gangrænæ præsentis & sphaceli testibus) de morbo feliciter subactō gloriabantur læti, lethi mox subsequuti nil suspicantes. 5. Miros Naturæ in morbis nervosi generis lusus ubi ignorabant, quoties Magi ac sagæ, quoties (videamus amici) Dæmones ipsi innocentes sub formula judicabantur? qui, ubi Hypochondriacæ Hystericæve passioni, ubi Melancholiæ, Maniæ, Epilepsiæ, catalepsi, aliisque hujus ordinis morbis naturales ac proprii melius innotuissent paroxysmi, citius certe Medicorum aphorismis ac Theologorum exorcismis respondissent, obsecundassent. 6. Vindicata autem est (sunt grates Deo, in orbe erudito a suis superstitionibus Medicina; neque, spero, in eas recidet usque, dum reviviscet virtus regum Galliæ in curandis strumis, Regum Angliæ in sananda epilepsia, Regum Hispaniæ in dæmonibus fugandis. 7. Febres miliares nostra in urbe & vicinia, in puerperis etiam, nunc esse rariores, rarissimeque malignas,





*introducæ SYDENHAMI, BOERHAVII, HAENII, aliorumque recentiorum methodo debetur. 8. Exanthematicæ febres pleræque primarum viarum vitioso fomite aluntur atque diarrhæis l. perfecte, l. tanquam crisi accessoria solvuntur, optimamque methodum in cauto leniorum cathartico- rum usu habent. 9. Variolarum Epidemia, quam cælum nostrum semper ante hac benigniorem, inoculationemque minus necessariam fecerat, nunc per aliquot annos multo funere infamis, eam reddit pro salute publica maxime commen- dandam. 10. Crusta, quam in sanguine per VSiem emisso, inflammatoriam dicunt, inflammationis partem haud habet, neque densum illud phlogisticum sistit, unde plerasque inflam- mationes perperam deducere solent. 11. Crusta hæc in ipsis globulis sanguineis solutionis potior, ac determinata species, plu- ribus naturæ usibus servit, tum involvendis demulcendisque in- flammationis stimulis, tum si superari nequeant, moto bono pure eliminandis. 12. Verum & solutio hæc nimia in fe- bribus inflammatoriis, tum circumfusus undequaque concre- tionibus, tum destructa sanguinis densitate, tum sua per cel- lulosas viscerum vitalium effusione lethalis est, ut perinde in- ter inflammationis exitus numerari mereatur.*

Victor Apollinæis Tua cinctus tempora lauris  
 Doctor eris, Medicique Chori celebratus honore.  
 Juncta Machaoniis nunc neçtito ferta coronis  
 Quæ Tibi lætus Hymen thalamo dicata jugali  
 Porrigit, & FRANCISCA pio sacrabit amore.  
 Perge, per Ottonis sylvas, quo Te bona ducunt  
 Fata, salutiferis herbis Tua nomina late  
 Sparge, seges docti redeat Tibi læta laboris.

H. G. A.

FACUL-



FACULTATIS MEDICÆ h. t. PRO-DECANUS  
FRANCISC. SCHOENMEZLER  
PHILOSOPHIÆ ET MEDICINÆ DOCTOR, PROFES-  
SOR PUBLICUS ET ORDINARIUS; NOSOCOMII  
MILITARIS MEDICUS

AD

DOCTISSIMI MEDICINÆ LAURÆ CANDIDATI

FRANCISCI ZUCCARINI Mannheimensis,  
AA. LL. ET PHILOSOPHIÆ MAGISTRI, SATRAPIÆ  
MOSBACENSIS PHYSICI ADJUNCTI

DISPUTATIONEM INAUGURALEM  
DE HYPOCHONDRIASI

DIE FEBRUAR. A. D. MDCCLXIX.

INVITAT

PRÆMISSO JUDICIO

*De Necessitate Laxantium in morbis exanthematicis.*

*Heddelberg.*







\* \*

\* \*

\* \*

**S**i in morbis, a primarum viarum cruditatibus originem trahentibus, expurgationes suadeam, tantum abest, ut Medicorum aliquis contradicat, ut potius has tanquam maxime necessarias unanimi ore contendant; cum autem in febribus quoque exanthematicis alvum non movendam solum, sed & liberaliter quandoque ducendam deprædicem, adeo hoc quibusdam & nostrorum præprimis paradoxum videbitur, ut non temerarium modo, sed & perniciosum quoque istud habebunt consilium. Reclamantes enim illos ex schola Stahliana cum Junckero a) audio, febres exanthematicæ conatus principii vitalis sunt, quibus motibus se- & excretoriis, ultra consuetum ordinem auctis, miasma aliquod subtile fermentescens ad peripheriam corporis extrudere intendit. Nolo longam cum illis de principii vitalis effectibus in corpus nostrum disputationem inire; charam illis, ab aliis sat explosam, largiar hypothesin: verum si animam in expellendo miasmate occupatam credant, animæ, quæso, non perniciosam ferant opem, non enim alexipharmacis, terreis, strictura alvi, atque toto calidi Regiminis apparatu non boni quid inferunt, cum his cuncta potius exasperentur.

Calidi Regiminis noxas ostendere, a scopo meo alienum foret, neque paucae hæ paginæ concederent, unicum tantum, quam in hisce febribus alvum lubricam fervare, quandoque autem largius provocare necessarium sit, ostendere allaborabo. Mirum cutim inter & alvum observamus consortium, fluente enim diarrhœa exsiccatur alvus, sudoreque alvum adstringi posse, nemo est, qui non noverit, & quoties ex cohibita transpiratione diarrhœæ excitantur, illi, qui suo damno pedum & abdominis refrigerium arcere didicerunt, bene noscunt. Nonne autem quod, quæ per cutim secedant, & per alvum duci posse, inde inferamus? Positoque, sed non concesso, in morbis exanthematicis miasma per cutim eliminari, nonne si alvus moveatur, non modo natura non turbabitur, sed miasmatis simul portio,

a) Conspectus Medicin. pract. auth. Junckero. pag. 595.



tio, quo mire natura alleviatur, per alvum educetur. Innoxium igitur, alvum in morbis exanthematicis referare eo magis habeant, cum ipsa natura, talem cum ægri levamine sæpius moliendo, viam ostendat. Cujus testem ipsum JUNKERUM habeo, qui cum de febre catarrhali Petechizante tractat, pag. 584. sic habet: *Licet diarrhææ petechizantem morbum non solvant, nec ullum positivum emolumentum hisce febribus adferre videantur, nullum tamen notabile damnum inferunt, & longe minoris periculi sunt, quam alvi adstrictiones.* Quo diarrhæas his morbis frequentes, & innoxias concedit; & cum alvi adstrictiones perniciosas habeat, quod his alvi fluxibus perniciofa eliminantur, concedat necesse est. Verum non innoxium solum, sed, in morbis exanthematicis, alvus ut moveatur, summe necessarium habeo. Si enim miasma aliquod in corpus penetrare valeat, illud ad vias alimentares, ut deferatur, fieri aliter nequit, quomodo autem copiose ibi continuo sedentes humores eodem non inficiantur? Hos humores nisi educas, nonne stasi & calore febrili magis corrumpentur? Corrupti autem novum indies miasma sanguini suppeditabunt.

Cum autem nunquam noxium, sed necessarium quoque in morbis exanthematicis sit alvum sollicitare, quid, si ab acri bilioso, viscido, putrido in primis viis hærente morbus foveatur? Nullam tunc profecto exanthematum, quæ symptomata tantum sunt, rationem habendam, sed ad putridam primarum viarum colluviem qua sublata febris sæpius quam citissime extinguitur, qua neglecta illa ex sphacelo intestinorum lethalis facile fit, respiciendum esse experientia didici; toties profecto licet serius vocatus unico catartico, quo copiosæ bilioso-viscidæ sordes expurgatæ fuerunt, omnem cum maculis febrim profigavi, cumque miseram hoc morbo, quod medicatio a parentibus neglecta fuit, peremptam puellam secarem, sphacelosa vidi undique intestina tenuia, quæ copiosis, putridis, biliosis, mucosis, sordibus turgebant. Atque hanc bilioso putridarum sordium colluviem morbos exanthematicos producere, hasque febres ad biliosas, putridas pro intensioris gradu numerandas, symptomatum comparatio docet. Nonne enim in illis insignem lassitudinem, appetitum prostratum, linguam mucosam, flavam, atram, aphtho-



aphtosam, anxietates, difficultatem respirandi, crebriores horripilationes, calorem mordacem, pulsum celerem, parvum, observamus? Sæpius conatus vomendi accedunt, & siqua rejiciuntur, aut viscida sunt, aut biliosa, alvo soluta fœtidissimæ, flavæ, aut viridiscientes fœces prodeunt. Hæc autem sic se habere, testimonia virorum in Medicina dignissimorum confirmant. MORTONUS b) morbillos & febrem scarlatinam a primo insultu synochos, ac malignas suspicari, fas esse, habet, atque inter symptomata, horrorem, nauseam, vomitionem, cephalalgiam, lassitudinem, fœtidatem oris, respirationem citam & anhelosam, hypochondriorum oppressionem refert.

ELLERUS c) cum de febribus malignis cum vel sine exanthematibus agit; (hac autem sectione omnes morbos exanthematicos comprehendit) inter symptomata magnam debilitatem & lassitudinem, pulsum frequentem parvum, dolores capitis, dorsi & artuum, omnis cibi fastidium, calorem ab initio levem, auctum postmodum, linguam siccam albicantem, crusta obductam, diarrhœam, ructus putridos, & vomitus biliosos numerat.

HUXHAMUS d) Petechiales febres, putridas appellat, atque inter symptomata præter maculas, capitis dolorem, nauseam, debilitatem, atque languorem, respirationem difficilem, pondus atque dolorem ad præcordia, porraceæ & nigræ bilis vomitum, linguam ab initio albam, postea nigram, crusta obductam, saporem omnium amarum recenset.

CAR. ALLIONIUS e) de febre miliari tractans, in graviore casu sæpe tertio die post expulsionem biliosam oriri diarrhœam fœtidissimam, hancque toto corruptionis tempore subsistere. Descripta autem symptomata in morbis biliosis & putridis occurrere, si quis negaret, horumce morborum Historiæ,

F 2

quæ

b) RICHARDI MORTON Pyretologia p. 12.

c) JO. THEODORI ELLER de cognoscendis & curandis morbis. sect. VI.

d) JO. HUXHAMI opera physico Medica, Tom. II. pag. 92.

e) Tractatio de miliar. orig. progress., natur. & curat. auctore CAROLO ALLONIO. pag. 41.



quæ TISSOTUS f) KLOEKHOF g) ROEDERER h) & alii omni fide dignissimi nobis consignaverunt, abunde demonstrant; quibus raro febres biliosas aut putridas, quin exanthemata efflorescant, grassari, simul apertum fit. Exanthematicos igitur morbos ab acri viscida plus minusve corrupta, subtili putrida biliosa materie in primis viis confluyente provenire apparet; quod ipse JUNCCKERUS diapnoicæ Methodi patronus, laxantiumque in exanthematicis insignis ossor, cum i) febres urticatas, scarlatinas, & morbillos cum petechialibus convenire, & tantum ratione exanthematum differre k), & febres petechiales ad catarrhales pertinere conveniat, in quibus diarrhæas \*) moderate succedentes non modo non noxias habet, sed licet morbum non solvant, attamen tolerabilem reddere, monet, nonne concedat? Quodsi autem in morbis biliosis & putridis, ut alvus non solum aperta fervetur sed & largius ducatur, rationi consentaneum videatur, ecurr in morbis exanthematicis ab eadem causa pendentibus id noxium sit? Bene ergo in Commentariis SWIETENIUS l) monet: *Si autem signa docuerint circa præcordia hævere sordes, a quibus exanthemata fieri dictum est, vomitorio vel purgante has educere conducat.* Atque hoc optima rerum magistra omnes attentos neque præjudiciis obcæcatos Practicos experientia docet. Inter Auctores, quorum scripta Practicis semper summi fuere ponderis, audiamus FRID. HOFFMANNUM m), apud illum, cum constitutionem epidemicam anni 1700 describit, sequentia notatu digna legimus: „In universum advertimus, præsertim hoc anno, semper tutius & melius fuisse cum ægris, „quan-

f) J. A. D. TISSOT Dissertatio de febribus biliosis.

g) CORN. ALB. KLOEKHOF Hist. febris Epidem. Culenburgensium.

h) GEORG. ROEDERERI opuscula. Med. T. I. de morbo mucoso.

i) Quo supra. Tabulæ 74. pag. 595.

k) Ibidem. Tab. 71. pag. 580. \*) 571.

l) Gerad. v. SWIETEN Comment. in aphor. BOERHAV. T. II. p. 408.

m) FRID. HOFFMANNI observat. Meteorologica. & epidem. Hallens. p. 103.



„quando alvus fuit lubrica, & fluida, & tali modo petechiales  
„& purpuratæ plurimæ sanatæ fuerunt, quod alias vulgari  
„practicorum opinioni minus respondet, qui alvi fluxus pete-  
„chialibus succedentes undequaque funestos proclamant; &  
„certe pessimus mos est, & multi hoc pacto moriuntur, quod  
„non modo sistant diarrhœas sponte provenientes, sed & sudo-  
„riferis curam absolvere intendant. In febribus hoc anno  
„grassantibus tam exanthematicis, quam sine illis, clysteres  
„& convenientia laxantia præstantissimam & quasi divinam  
„tulerunt opem,,. Eandem quoque in exanthematicis laxandi  
necessitatem præstantissimus observator HUXHAM perspexit:  
„Non ventriculus solum (in libro de febribus inquit) \*) sed  
„totus intestinorum canalis sub febris (Exanthematicæ scil.)  
„initia evacuari debet. Ego vero experientiam & rationem,  
„hoc efficiendi methodo moderatiore, demonstrare necessita-  
„tem pro certo habeo: Tali ratione sollicitudo me non tenet,  
„quin vomitum, aut unam aut alteram alvi dejectionem pro-  
„moveam, quando illud quocunque febris tempore, gustu  
„oris amaro, ventriculi ægritudine, ructibus nitrosis, fœtidis,  
„nimia alvi obstipatione, abdomine tumido, borborygmis,  
„doloribus vellicantibus, cæterisque indicatur.

Et optimum hujus methodi effectum ELLERUS n) atte-  
statur, cum enim ad modum febrium malignarum, quas an-  
nis 1726, 1736, 1741, 1757 & 1758. observavit, generalem  
nobis febris malignæ, ad quam purpuram rubram, albam,  
vesicularem, & petechias refert, descriptionem sistat, (bene  
notat) „Si humorum colluvies cum bile corrupta in intestinis  
„accumulata est, quæ flatibus fœtidis, spasmodica abdominis  
„tensione, colicisque doloribus, & diarrhœa quandoque spu-  
„mescente olida indicatur, educenda statim est laxante debili,  
„& postquam gravissima indecursu morbi symptomata expo-  
„suit, subjungit pag. 127. „præcaventur aliquo modo ejus-  
„modi periculosiora, si statim sub febris ingressum tractus  
„intestinorum, a saburra fœcum, a miasmatum contagio, & bile

\*) Cap. VIII. pag. 108.

n) Quo supra pag. 121.



„putrida infectorum blande purgetur, & in morbi decursu  
„nova, corruptæ hujus materie collectio clismatibus hinc in-  
„de eluatur,,.

Atque haud pridem catartlicorum præstantiam in pete-  
chiali morbo CAR. STRACK commendavit, qui horum effica-  
ciam centum morborum historiis corroboravit. Neque me  
hæc medendi ratio fefellit unquam, cum enim superiore anno  
gravis hujus morbi epidemia vigeret, omnibus, qui meæ se  
commiserant curæ, pro diversa indicatione & catartica &  
emetica præscripsi; quod omnibus profuit, pluresque a gra-  
vissimo liberavit periculo. Ad juvenem undecima morbi die  
accerfor, gravissimo hypochondrii dextri dolore tenetur; anxie  
breve ducit spiritum; maximus extat artuum languor; fri-  
gido totum corpus sudore madet; pulsus parvus, celer &  
inæqualis est, adeo dolent fauces, ut ne guttula quidem de-  
glutiri possit; lingua arida fusca est, & excoriata, totamque  
cutim maculæ atro purpureæ obsident; acre clisma injicitur,  
fætidissimæ sordes prodeunt; clisma ordinarium omni bihorio  
ordinatur, æque fætida prodeunt, elapsis 24 horis jam libera,  
licet molesta adhuc, est deglutitio, dolor hypochondrii minui-  
tur, atque respiratio facilius succedit, potio emetico catartici  
ca hauritur, sursum ac deorsum putridissima expelluntur; mi-  
tiora adhuc sunt symptomata; decoctum ex Tamarindis cum  
ermore fri tertia die successive assumitur; jam fluente alvo  
omne periculum abest, quarta a medicatione die morbus lar-  
ga & fætente diarrhœa solvitur.

In febre miliari, cum aliis laxantia ALLIONIUS o) com-  
mendat, „Corruptiva humorum indoles, ait, non modo ad-  
„hibitionem subacidorum requirit, verum etiam, ut corrupta  
„alvo exonerentur; viam monstrante natura, quæ sæpe eo in  
„casu, cum ægri utilitate e corpore eliminat biliosa fætidissi-  
„ma,,. Quod & propria me toties experientia docuit. Gra-  
vissime hyeme elapsa puerpera, ex qua more solito plumis,  
atque ardente foco sudor eliciebatur, miliaribus per octiduum

ne-

o) Ut supra pag. 102.



neglectis decumbit: magna est præcordiorum angustia, maxima respirandi difficultas, plena circa proprium morbum incuria, agrypnia, frequentissima lypothimia, tensum abdomen, alvus adstricta, sudore exhauriente, acidum spirante difluit, aquea prodit urina, intensa sitis est, pulsus parvus celer, contractus. Meo jussu extinguitur focus, levi obtegatur stragulo, indies per apertas fenestras aër renovatur, liberali manu acida mineralia porriguntur, parum vini potui admiscetur; indies clismate ad minimum semel alvus solvitur; atque tantum abest, ut inde pustulæ miliares recedant, ut potius copiosiores, at sine gravi symptomate, erumpant, atque tali medicatione tandem integre convaluit. Et quantum alvi ductiones in variolis valeant, præter AVICENNAM p) SYDENHAMUM q) BOERHAVIUM r) MEADUM s) ROSENSTEINIUS t) TISSOTUS u) viri, quorum auctoritas in Medicina semper maxima erit, aliique quam plures testantur. Verum jam me angusti harum pagellarum limites intra cancellos revocant; gravissimam quare materiem maturis dignissimam lucubrationibus, ad aliud tempus relinquo; atque jam publice commendandum habeo Doctissimum Medicæ Laureæ Candidatum

## FRANCISCUM ZUCCARINI

AA. LL. & Philosophiæ Magistrum. Satrapiæ Mosbacensis  
Physicum Adjunctum.

Hic in nostra Academia Docentibus Celeberrimo OBERKAMPPIO Praxeos, Materiæ Medicæ ac Formularum; Clarissimo GATTENHOFFIO Institutionum, Materiæ Medicæ, & Praxeos; Nobis autem Anatomix, Chirurgiæ & Medicinæ forensis fundamenta posuit, emessoque studiorum cursu, examinibus nostris se subjecit, quibus superatis, summos in Medicina honores

p) AVICEN. Canon. lib. IV. Fen. I. Tract. IV.

q) THOM. SYDENHAM Process. in morbis fere omnibus.

r) BOERH. aph. §. 1394. 1412.

s) Von Kinder-Blattern.

t) Abhandl. von Kinder-Kranckheiten.

u) De Variolis apoplex. & Hydrop.



nones honeste petens, iisque dignus a facultate habitus, ut  
condecoretur, nostrisque satisfactorius statutis, sub præsidio  
Clarissimi Collegæ GATTENHOFFII, Professoris publici &  
ordinarii Dissertationem de *Hypochondriasi*, præmissa lectione  
cursoria de Ufu Cataracticorum in variolis ventilabit.

Quem actum, ut Magnus Academiæ RECTOR, Illu-  
stris PROCANCELLARIUS, Gravissi Senatus Academici  
PROCERES, Hospites omnium ordinum litteratissimi, Cives-  
que inprimis nostri Generosissimi & Nobilissimi ornare velint,  
quam humanissime rogo. D. in Universitate Palatina die  
Febr. A. D. MDCCLXIX.

(L. S.)